

Marko Asempa No

Yohane Osubɔni Aseɛka

¹ Asempa a efa Yesu Kristo, Onyankopɔn Ba no ho no, ahyeasese nie. ² Wɔatwerɛ wɔ Odiyifoɔ Yesaia nwoma no mu se,

“Mesoma me ɔɔfoɔ adi w’anim ekan.

Ɔno na ɔbesiesie ekwan ama wo.”

³ “Nne bi reteam firi esere so se,

‘Monsiesie ekwan mma Awurade,

mommɔ akwan a etene mma no.’”

⁴ Enti Yohane ba bebɔɔ asu wɔ esere so, ɔkaa adwensakyera asubɔ a ema bɔnefakye ho asem.

⁵ Nnipa fifiri Yerusalem ne Yudea nkuro so kɔhunuu Yohane, tiee no. Na wɔkaa wɔn bɔne kyerɛɛ no no, ɔbɔɔ wɔn asu wɔ Asubɔnten Yordan mu.

⁶ Na Yohane hye atadeɛ a wɔde yoma nhoma na apam a aboa nhoma abɔsɔɔ nso bɔ mu. Na n’aduane ye ntutumme ne ewɔɔ.

⁷ Ne nkyerekyere no mu, ɔkaa se, “Erenkyere koraa, obi beba a ɔwɔ tumi sene me a, ne mpaboa ahoma mpo, mense se mekoto mesane.

⁸ Me deɛ, mede nsuo na ebo mo asu, na ɔno deɛ, ɔde Honhom Kronkron na ebebo mo asu!”

Yesu Asubɔ Ne Ne Sɔhwɛ

⁹ Eɔa bi, Yesu firii Nasaret a ewɔ Galileaman mu ba maa Yohane bɔɔ no asu wɔ Asubɔnten Yordan mu.

¹⁰ Yesu firi nsuo no mu sii konkon so ara pe, ɔhunuu se ɔsoro abue, na Honhom Kronkron resiane se aborɔnoma aba ne so. Saa

ɛberɛ no ara mu, ¹¹ enne bi firi ɔsoro kaa sɛ, “Wone me Dɔ Ba a wosɔ m’ani.”

¹² Ɛhɔ ara, Honhom Kronkron de Yesu kɔɔ ɛsere so. ¹³ Ɔtenaa hɔ adaduanan a na obiara nka ne ho ka wiram mmoa nko ara. Ɛhɔ na ɔbonsam sɔɔ no hwɛɛɛ. Akyire yi, abɔfoɔ ba besom no.

¹⁴ Ɔhene Herode kyeree Yohane akyi no, Yesu kɔɔ Galilea kɔkaa asempa no wɔ hɔ. ¹⁵ Ɔkaa sɛ, “**Ɛberɛ no awie du! Onyankopɔn Ahennie no abɛn. Monnu mo ho na monnye asempa no nni!**”

Asuafoɔ A Wɔdi Ekan No Frɛ

¹⁶ Ɛda bi a Yesu nam Galilea mpoano no, ɔhunuu Simon ne ne nua Andrea sɛ wɔregu asau. ¹⁷ Yesu frɛɛ wɔn sɛ, “**Mommɛdi m’akyi! Na mema mo aye nnipayifoɔ.**” ¹⁸ Ɛhɔ ara, wɔgyaa wɔn asau no guu hɔ bedii n’akyi.

¹⁹ Ɔkɔɔ n’anim kakra no, ɔhunuu Sebedeo mma baanu a wɔfrɛ ɔbaako Yohane, ɛna ɔbaako nso Yakobo, sɛ wɔte kodoɔ mu reye wɔn asau ho adwuma. ²⁰ Ɔfrɛɛ wɔn nso sɛ wɔmmɛdi n’akyi. Ntɛm ara, wɔgyaa wɔn agya Sebedeo ne n’apaafɔɔ hɔ wɔ kodoɔ no mu bedii n’akyi.

Yesu Tu Honhommone

²¹ Yesu ne n’akyidifoɔ yi beduruu Kapernaum. Na Homeda duruie no, ɔkɔɔ asɔredan mu kɔkaa asempa no. ²² Nnipa no tee asem no no, wɔn ho dwirii wɔn, ɛfiri sɛ, ɔkasaa te sɛ obi a ɔwɔ tumi, na mmom wankasa sɛ Atweresɛm no akyerɛkyerɛfoɔ no. ²³ Amonom hɔ ara, ɔbarima bi a ɔwɔ wɔn hyiadan no mu hɔ a ɔwɔ honhommone team mu sɛ, ²⁴ “Ɛdeɛn na wo Nasareni Yesu ne yen wɔ ye? Woaba sɛ

worebesɛɛ yɛn anaa? Menim wo sɛ wone Onyankopɔn Ba Kronkronni no!”

²⁵ Yesu teatea honhommɔne no sɛ, “**Mua w’ano! Firi ne mu kɔ!**” ²⁶ Honhommɔne no wosoo saa ɔbarima no, ma ɔteateaam den na etu kɔɛɛ.

²⁷ Nnipa no nyinaa ho dwirii wɔn, ma wɔbisabisaa wɔn ho wɔn ho sɛ. “Nkyerɛkyerɛ foforoɔ ben ni? Ahonhommɔne mpo tie ne nne!”

²⁸ Saa anwanwadeɛ a ɔyɛɛ yi ho nsem tre faa Galileaman mu nyinaa.

Yesu Sa Nyarewa

²⁹ Wɔfirii hyiadan no mu no, wone Yakobo ne Yohane kɔɔ Simon ne Andrea efie. ³⁰ Na Simon ase baa eɔda mpa so a hurae akyere no, na wɔkaa ne ho asem kyerɛɛ Yesu. ³¹ Yesu kɔɔ baabi a ɔda ho, kɔsɔɔ ne nsa, ma ɔsɔre tenaa ase. Eho ara, hurae no tu firii ne so. Ɔsɔre noaa aduane maa wɔn.

³² Eduruu anwummere no, nnipa no de ayarefoɔ ne wɔn a wɔwɔ ahonhommɔne breɛ Yesu sɛ ɔnsa wɔn yadeɛ. ³³ Kuro mu no nyinaa beboaa wɔn ho ano wɔ efie no aboboano, ³⁴ na Yesu saa ayarefoɔ bebree yadeɛ. Ɔtuu ahonhommɔne bebree nso. Nanso, wamma ahonhommɔne no ankasa, efiri sɛ, na wɔnim no.

Yesu Twee Ne Ho Kɔbɔɔ Mpaɛɛ

³⁵ Ahemadakyɛ a na enim nteteeɛ no, Yesu sɔre firii efie ho kɔɔ baabi a eho ye dinn, kɔbɔɔ mpaɛɛ wɔ ho. ³⁶ Simon ne wɔn a wɔka ne ho firii adi kohwehwɛɛ no, ³⁷ na wɔhunuu no no, wɔka kyerɛɛ no sɛ, “Nnipa bebree rehwehwe wo.”

³⁸ Ɔka kyerɛɛ wɔn sɛ, “Ɛsɛ sɛ yɛkɔ nkuro a aka no so, na mekɔka m’asɛm kyerɛ wɔn, ɛfiri sɛ, ɛno enti na mebaɛɛ.” ³⁹ Enti, ɔkɔɔ Galileaman mu baabiara kɔkaa asɛmpa no wɔ asɔredan mu, tuu ahonhommɔne bebree nso.

Yesu Sa Ɔkwatani Bi Yadeɛ

⁴⁰ Ɔkwatani bi bɛkotoo no srɛɛ no sɛ, “Sɛ ɛyɛ wo pɛ a, wobɛtumi ama me ho ate.”

⁴¹ Yesu hunuu ɔkwatani no mmɔbɔ, enti ɔde ne nsa kaa no kaa sɛ, “Mɛpɛ! **Wo ho mfi!**”

⁴² Amonom hɔ ara, ne ho teeɛ, maa ne ho tɔɔ no!

⁴³ Yesu bɔɔ n’ano dendeenden sɛ, ⁴⁴ “Nka saa asɛm yi nkyerɛ obiara, na mmom, fa wo ho kɔkyerɛ ɔsɔfoɔ. Sɛ worekɔ a, fa w’afɔrebɔdeɛ a Mose ahyɛ sɛ akwatafoɔ a wɔasa wɔn yadeɛ mfa nka wɔn ho nkɔ no ka wo ho kɔ, sɛdeɛ ɛbɛma obiara ahunu sɛ wo ho atɔ wo bio.”

⁴⁵ Nanso, ɔrekorɔ no nyinaa, na ɔde nteateamu rebɔ n’ayaresa no ho dawuro. Esiane yɛi enti, sɛ Yesu kɔ baabiara a, nnipadɔm bɛtwa ne ho hyia. Ɛno enti, afei baabiara a ɔbɛkɔ no, ɔnnɔyi ne ho adi. Enti, ɔtenaa ɛsɛrɛ so hɔ maa nnipa bebree baa ne nkyɛn wɔ hɔ.

2

Yesu Sa Obubuafoɔ Bi Yadeɛ

¹ Nna bi akyi no, Yesu kɔɔ Kapernaum bio. Ɔduruu hɔ no nnipa pii tee sɛ waba hɔ.

² Ankyerɛ na nnipa bebree bɛhyɛɛ ɛfie a na ɔwɔ mu no mu ma tɔ. Ɔkaa asɛmpa no kyerɛɛ wɔn.

³ Mmarima baanan bi de obubuafoɔ bi a wɔso no baa hɔ. ⁴ Esiane sɛ na wɔntumi mfa nnipadɔm

no mu nko Yesu nkyen no enti, wɔforoo edan a Yesu wɔ mu no, kɔtuu tokuro wɔ atifi. Wɔde obubuafoɔ a ɔda ne ketɛ so no faa mu, gyaagyaa no brɛoo de no kɔtoo Yesu anim. ⁵ Yesu hunuu wɔn gyidie a wɔwɔ wɔ ne mu no, ɔka kyerɛɛ ɔyarefoɔ no sɛ, **“Ɔba, wɔde wo bɔne akyɛ wo!”**

⁶ Nanso Atwerɛsem no akyerɛkyerɛfoɔ a wɔwɔ hɔ no tee deɛ Yesu kaɛɛ no, wɔdwenee wɔ wɔn tirim ⁷ sɛ, “Asem bɛn na ɔreka yi! Abususɛm na ɔreka yi! Ɔdwene sɛ ɔyɛ Onyankopɔn? Onyankopɔn nko na ɔtumi de bɔne kyɛ.”

⁸ Yesu hunuu wɔn adwene no, ɛhɔ ara, ɔka kyerɛɛ wɔn sɛ, **“Adɛn na moma asem a mekaɛ yi ha mo? ⁹ Deɛ ɛwɔ he na ɛyɛ mmɛrɛ? Sɛ obi bɛka akyerɛ obubuafoɔ no sɛ, ‘Wɔde wo bɔne akyɛ wo’, anaase, ‘Fa wo ketɛ na nante’? ¹⁰ Enti mɛkyerɛ mo sɛ Onipa Ba no wɔ tumi sɛ ɔde bɔne kyɛ.”** Enti ɔka kyerɛɛ obubuafoɔ no sɛ, ¹¹ **“Mese wo sɛ, sɔre gyina hɔ. Fa wo ketɛ, na kɔ wo efie na wo ho ato wo.”** ¹² Obubuafoɔ yi sɔre bobɔɔ ne ketɛ, na ɔde anigyɛɛ ne ahosɛpɛ faa nnipadɔm no mu kɔɛɛ. Nnipa no ho dwirii wɔn, ma wɔkamfoo Onyankopɔn sɛ, “Yɛnhunuu yɛi bi da!”

Yesu Frɛ Lewi

¹³ Yesu sane kɔɔ mpoano hɔ bio, na ɔkaa asempana no kyerɛɛ nnipakuo a wɔahyia wɔ hɔ no.

¹⁴ Ɛberɛ a ɔnam mpoano hɔ no, ɔhunuu Alfeo ba Lewi sɛ ɔte atogyɛɛ. Ɔhunuu no no ɔka kyerɛɛ no sɛ, **“Di m’akyi.”** Ɛhɔ ara, Lewi sɔre dii n’akyi.

¹⁵ Saa ɛda no anadwofa, Lewi too ɛpono, too nsa frɛɛ n’afɛfoɔ ɔtogyɛfoɔ ne nnebɔneyɛfoɔ bi sɛ wɔmmra na ɔne wɔn ne Yesu ne n’asuafoɔ no nto nsa nnidi. Nnipa a wɔdii Yesu akyi no

bi te se Lewi ara pe. ¹⁶ Farisifoɔ no hunuu se ɔne nnebɔneyefoɔ ne ɔtogyefoɔ ato nsa redidi no, wɔbisaa n'asuafoɔ no se, "Aden enti na ɔne ɔtogyefoɔ ne nnebɔneyefoɔ to nsa didi?"

¹⁷ Yesu tee deɛ wɔkaɛɛ no, ɔbuaa wɔn se, "Wɔn a wɔwɔ ahooɔden no, ɔyaresafoɔ ho nhia wɔn, na wɔn a wɔyare no na ɔyaresafoɔ ho hia wɔn. Mamma se merebeka akyerɛ tene-neefoɔ se wɔnsakyera wɔn adwene na mmom, nnebɔneyefoɔ."

Mmuadadie Ho Asemmisa

¹⁸ Eɔa bi a Yohane Osubɔni akyidifoɔ ne Farisifoɔ no redi mmuada no, nnipa bi kɔɔ Yesu nkyɛn kobisaa no se, "Aden enti na Yohane ne Farisifoɔ no akyidifoɔ di mmuada na w'akyidifoɔ deɛ, wɔnni mmuada?"

¹⁹ Yesu nso bisaa wɔn se, "Moahunu ayeforɔkunu nnamfo a wɔbɛba ayeforɔ ase a wɔbɛka se, wɔredi mmuada enti wɔrennidi anaa? Mmerɛ dodoɔ a wɔne ayeforɔkunu no nam no deɛ, wɔrenni mmuada da. ²⁰ Nanso, eɔa bi bɛba a, wɔbɛfa ayeforɔkunu no afiri wɔn nkyɛn. Saa eberɛ no na wɔbɛdi mmuada.

²¹ "Ete se wode ntoma foforoɔ atare ntoma dada mu. Edeɛn na eba? Ntaremu no bɛte ntoma dada no mu, na ayi afiri mu, na ama tokuro a eɔa ho no aso asene kane deɛ no. ²² Monim se, wɔmfa nsã foforoɔ ngu aboa nwoma nkotokuo dada mu. Anyɛ saa a, eɛɛpae. Nsa no behwie agu, na nkotokuo a nsã no wɔ mu no nso bɛpaapae. Eɛɛ se wode nsã foforoɔ gu nkotokuo foforoɔ mu."

Homeda Die Ho Asem

²³ Homeda bi a Yesu ne n'asuafoɔ nam aburoo-fuo bi mu no, asuafoɔ no pempan aburoo no bi weeɛ. ²⁴ Farisifoɔ no bi ka kyerɛɛ Yesu sɛ, "Enni ho kwan sɛ wɔyɛ saa! Yen mmara mma ho ekwan sɛ wɔbu aburoo Homeda."

²⁵ Yesu nso bisaa wɔn sɛ, "Monkenkanee deɛ Ɔhene Dawid yɛɛɛ, eberɛ a ekom dee ɔne wɔn a na wɔka ne ho no, ²⁶ ne sɛdeɛ ɔkɔɔ Onyankopɔn efie, Ɔsɔfopanin Abiatar berɛ so, na ɔne wɔn a wɔka ne ho kɔdii burodo a wɔde abɔ afɔdeɛ ama Onyankopɔn no, a obiara nni ho ekwan sɛ ɔdi, agye asɔfoɔ nko ara no pen? Na eno nso tia mmara.

²⁷ "Onipa enti na wɔyɛɛ Homeda, na enyɛ Homeda enti na wɔbɔɔ onipa. ²⁸ Na me, Onipa Ba no mpo, meyɛ Homeda no nso wura!"

3

Yesu Sa Obi A Ne Nsa Awuo Yadeɛ

¹ Yesu baa Kapernaum no, ɔkɔɔ hyiadan mu bio. Ɔduruu hɔ no, ɔhunuu ɔbarima bi a ne nsa baako awu. ² Na saa eɛda no yɛ Homeda enti na Yesu atamfoɔ no retetɛ no ahwe sɛ ɔbɛsa ɔbarima no yadeɛ anaa. Na wɔabɔ wɔn tirim sɛ, sɛ ɔsa no yadeɛ a, wɔbɛkyere no! ³ Yesu ka kyerɛɛ ɔbarima no sɛ, "Sore gyina nnipa no anim."

⁴ Ɔdaneɛ ne ho kyerɛɛ n'atamfoɔ no bisaa wɔn sɛ, "Eyɛ sɛ obi yɛ papa Homeda? Anaase eyɛ eɛda a wɔde yɛ bɔne? Eyɛ eɛda a wɔde gye nkwa anaa wɔma obi nkwa hwere no" Nanso, wɔammua no.

⁵ Ɔde abufuo hwɛɛ wɔn hyiaɛɛ. Ehaa no sɛ wɔnni ahummɔborɔ mma nnipa enti ɔka kyerɛɛ ɔbarima no sɛ, "Tene wo nsa no mu." Ɔteneɛ

mu, na amonom ho ara, ne nsa no yee yie. ⁶ Eho ara, Farisifoɔ no kɔhyiaa Herodefoɔ no ne won susuu ekwan a wɔɔɛfa so akum Yesu no ho.

Nnipadɔm Tu Di Yesu Akyi

⁷ Yesu ne n'asuafoɔ no firii ho koo mpoano. Nnipadɔm fifiri Galilea, Yudea, Yerusalem, ⁸ Idumea, Asubonten Yordan agya, Tiro ne Sidon fam nyinaa, tu dii Yesu akyi. Efiri se, na n'anwanwadee a oye no atre afanan nyinaa enti na ebinom pe se wɔɔɛhwe no. ⁹ Oka kyeree n'asuafoɔ no se, wɔmpɛ kodoɔ bi nsi nkyen baabi, na se nnipadɔm no kyere ne so wo mpoano ho a, watena mu ako. ¹⁰ Eda no, na wasa nyarewa bebre. Nanso, na ayarefoɔ no ba ara na wɔɔɛba a wɔɔɛ se wɔde won nsa ka n'atadee. ¹¹ Eberɛ biara a won a wɔwɔ ahonhommone no bi behunu no no, wɔtwa hwe fam, woso biribiri, ka se, "Woye Onyankopɔn Ba." ¹² Nanso, oboɔ won ano se, wonnkyere onipa ko a oye.

Asuafoɔ Dumieniu No Yie

¹³ Akyire yi, okoo bepo so frɛɛ won a wayi won no baa ne nkyen. ¹⁴ Oyii won mu dumieniu a daa wone no benante, na wɔakoka asempa no, ¹⁵ na wɔatu ahonhommone nso.

¹⁶ Dumieniu a oyii won no din nie:

Simon a otoo no din foforo Petro.

¹⁷ Sebedeo mma Yakobo ne Yohane nso, ofrɛɛ won Boanerges a, aseɛ ne aprannaa mma.

¹⁸ Won a woka ho nso nie: Andrea, Filipino,

Bartolomeo,
 Mateo,
 Toma,
 Alfeo ba Yakobo,
 Tadeo, ne
 Simon ὁmanyεφοῶ,
¹⁹ ἔnna Yuda Iskariot a ὄyii no maeε no.

²⁰ Ɔsane baa efie a ɔte mu no mu no, nnipakuo bi sane baa ne so bio. Ankyere koraa na εḥo nyinaa yεε ma a ɔnnya εkwan koraa nnidi. ²¹ Ne fiefoῶ tee asem a aba no, wḓkḓḓ hḓ sε wḓrekḓfa no akḓ wḓn efie εfiri sε, wḓkaa sε, “Ne tiri mu ka no.”

Yesu Ka Nyaatwomfoῶ Anim

²² Atweresεm no akyerεkyerεfoῶ a wḓfiri Yerusalem baeε no kaa sε, “Beelsebul a ɔye ahonhommḓne panin no afa no, na ɔnam saa tumi no so na ɔtu ahonhommḓne no.”

²³ Yesu frεε wḓn kasa kyerεε wḓn abεbuo mu sε, “Ebyε den na Ɔbonsam bεtumi atu Ɔbonsam? ²⁴ Ahennie biara a εne ne ho di asie no bεgu. ²⁵ Saa ara na efie biara a εne ne ho di asie no nnyina ara ne no. ²⁶ Na sε Ɔbonsam twa ne ho ne ne ho di asie a, εbyε den na watumi adi nkonim? Ɔbedi nkoguo. ²⁷ Obiara ntumi nkḓ ɔhḓɔdenfoῶ efie nkḓfa ne nneεma kwa, agye sε, onii no di εkan kyekyere ɔhḓɔdenfoῶ no, ansa na watumi afa ne nneεma. ²⁸ Mereka akyerε mo sε, bḓne a onipa aye biara no, wḓtumi de kye no, na mpo obi ka abususem tia me a, wḓtumi de kye no; ²⁹ nanso deε ɔka abususem tia Honhom

Kronkron no deɛ, wɔremfa nkye no da. Eye bone a ɛrempepa da.”

³⁰ Ɔkaa saa aɛɛm yi ɛfiri sɛ, na wɔka sɛ, “Ɔwɔ honhommɔne.”

Yesu Maame Ne Ne Nuanom

³¹ Ɔgu so rekyerɛkyere no, ne maame ne ne nuanom beɣinaa nnipadɔm no mu baabi somaa obi sɛ, ɔnkɔfrɛ no mmra, na wɔne no nkasa.

³² Saa ɛberɛ no na nnipadɔm no atwa ne ho ahyia. Nnipa no ka kyerɛɛ Yesu sɛ, “Wo maame ne wo nuanom gyina afikyire hɔ pɛ sɛ wɔne wo kasa.”

³³ Yesu bisaa wɔn sɛ, **“Hwan ne me maame? Ehefoɔ ne me nuanom?”**

³⁴ Ɔhwɛɛ nnipadɔm no hyiaɛɛ kaa sɛ, **“Yeinom ne me maame ne me nuanom! ³⁵ Obiara a ɔbeyɛ Onyankopɔn apɛdeɛ no, ɔno ne me nuabarima ne me nuabaa ne me maame.”**

4

Ogufɔɔ Ho Ebe

¹ Ɛberɛ a ɔgu so rekyerɛkyere no, nnipadɔm sane betwaa ne ho hyiaɛɛ wɔ mpoano hɔ. Yei enti, ɔkɔtenaa kodoɔ mu, toaa ne nkyerɛkyere no so. ² Na sɛdeɛ ɔye daa no, ɔnam mmɛbuo so kasa kyerɛɛ wɔn. Baako a ɔkaɛɛ ne sɛ, ³ **“Eɔa bi, ogufɔɔ bi kɔɔ n’afuom kɔguu aba. ⁴ Ɔgu so regu aba no, aba no bi guu kwankyɛn, maa nnomaa besosɔɔ ne nyinaa diiɛ. ⁵ Ebi nso kɔguu ɔbotan bi so. Nanso, dɔtɛɛ a ɛwɔ so no nnɔɔso. ⁶ Ankyere na ɛffiriɛ, nanso ɛsiane sɛ dɔtɛɛ a ɛwɔ ɔbotan no so no nnɔɔso no enti, owia bɔɔ so no, ne nyinaa hyeeɛ. ⁷ Aba no bi nso guu nkasɛɛ mu,**

maa nkasεε no kyekyeree no enti antumi anso aba. ⁸ Aba no bi nso guu asase pa mu, maa ebi nyini soo mm̄oho aduasa, ebi aduosia, enna afofor̄o nso mm̄oho ɔha!”

⁹ Na Yesu kaa sε, “Ma deε ɔw̄o aso no ntie!”

¹⁰ Akyire no a εkaa ɔne dumieniu no ne asuafoɔ afofor̄o bi no, w̄obisaa no sε, “Asem a wokaeε no, aseε ne sen?” ¹¹ Ɔbuaa w̄on sε, “Mo deε, w̄oada Onyankop̄on Ahennie ho ahintasεm adi akyere mo. Nanso, afofor̄o deε, w̄oka no abebuο mu na ekyerε w̄on. ¹² Esiane saa nti,

“W̄ohunu na w̄ote, nanso w̄orente deε w̄ote no ase,

na w̄orennane mma Onyankop̄on nkyen, na w̄oremfa w̄on b̄one nso nkyε w̄on.’

¹³ “Na sε moante saa bε yi ase a, εbeyε den na moate mm̄ε ahodoɔ a merebebuο no ase?

¹⁴ Ogufoɔ no gu aba a eyε asem no. ¹⁵ Aba a eguu kwankyen no gyina h̄o ma w̄on a w̄ote Onyankop̄on asem, nanso sε w̄ote asem no a, ntem so, ɔbonsam ba w̄on nkyen, ma w̄on werε firi deε w̄oate no nyinaa. ¹⁶ Aba a eguu ɔbotan so no gyina h̄o ma nnipa a w̄ode anigyεε tie asem no. ¹⁷ Nanso, w̄ote sε aba a afifiri foforo a ne nhini nk̄o fam. Ahyεaseε no, w̄ok̄o so fεfεfε, nanso sε eba sε asem no enti, ɔtaa anaa amanehunu bi to w̄on pε, na w̄oapa aba. ¹⁸ Aba a eguu nkasεε mu no nso gyina h̄o ma nnipa a w̄ote asempa no, ¹⁹ nanso enkyyere koraa na ewiase yi mu afεfεdeε ne ahonyadeε ne ɔbra yi mu dadwene, nnaadaa ne nnesema bi ho ak̄onn̄o abεhyε w̄on akoma mu. Yei enti, asem no ntumi nso aba biara. ²⁰ Aba a eguu asase pa mu no gyina h̄o ma w̄on a w̄ote Onyankop̄on asem no,

na woso aba bebre. Nnipa no bi so mmoho aduasa. Ebi nso so aduosia, na afoforo nso so oha.”

Kanea So Mfaso

²¹ Afei, Yesu bisaa wɔn sɛ, “Moahunu obi a ɔso kanea na ɔde hye mpa ase, anaase ɔde ahina butu so? Dabi! Wode kanea si petee mu na ahyeren ma eho aba mfaso. ²² Dee ahinta biara no, wɔbɛda no adi, na dee wɔakata so biara no, wode bɛto dwa. ²³ Dee ɔwɔ aso a ɔbetie no, ma ontie!

²⁴ “Monhwɛ yie wɔ dee mote no ho. Dee mote no, eno ara na wode bɛma mo, na aboro so mpo. ²⁵ Dee ɔwɔ biribi no, wɔbɛma no bi aka ho; dee ɔnni ahe bi no, kakraa a ɔwɔ no mpo, wɔbɛgye afiri ne nsam.”

Aba A Erenyini Ho Ebe

²⁶ Ɔkaa bio sɛ, “Sedee Onyankopɔn Ahennie no tee nie: okuafoɔ bi gu aba wɔ asase bi so. ²⁷ Awia ne anadwo, sɛ ɔda o, sɛ ɔnyane o, aba no fefe a ɔnnim sedee eyɛɛɛ a enyiniie. ²⁸ Asase no ankasa bɔ n’aduane, dua no na edi kan, afei epɛɛɛ na abɔ, ama aba no anyini. ²⁹ Sɛ aba no nyini wie a, okuafoɔ no fa ne dadeɛ kɔtwa, efiri sɛ otwa bere aduru.”

Onyina Aba Ho Ebe

³⁰ Ɔsane kaa sɛ, “Edeɛn ho na yede Ɔsoro Ahennie no bɛto, anaa abɛbusɛm bɛn na yede bɛkyerɛkyere mu? ³¹ Ete sɛ onyina aba, a eyɛ ketewaa wɔ aba a wodua nyinaa mu. ³² Na sɛ wodua a enyini ye keɛɛ sene nnua a aka no

nyinaa, eyiyi mman akeseɛ ma ewiem nnomaa besisi ne nwunu mu.”

³³ Mmɛbuo a etete sɛ yeinom na Yesu de kaa asem no kyerɛɛ wɔn, sɛdeɛ wɔbetumi ate aseɛ.

³⁴ Onam mmɛbuo so na okasa kyerɛɛ wɔn a wɔbetiee no no nyinaa, na sɛ eka onɛ n’asuafoɔ no nko a, okyerɛ wɔn ne nyinaa ase.

Yesu Brɛ Ahum Ase

³⁵ Eduruu anwummerɛ no, Yesu ka kyerɛɛ n’asuafoɔ no sɛ, “**Momma yɛntwa nkɔ asuogya noho.**” ³⁶ Okaa saa no, wɔgyaa nnipadom no wɔ ho, na onɛ wɔn kɔɛɛ a akodoɔ foforo di wɔn akyi.

³⁷ Preko pɛ, ahum keseɛ bi tuiɛ, maa asorokye bu bekataa kodoɔ no so, ma eyɛɛ sɛ eremem.

³⁸ Saa eberɛ no, na Yesu wɔ kodoɔ no to de ne ti ato sumiɛ so ada. Asuafoɔ no de ahopopoɔ ne nteateamu kɔnyanee no kaa sɛ, “Okyerɛkyerɛfoɔ, yereyɛ amem yi, emfa wo ho?”

³⁹ Osore teateaa mframa no ka kyerɛɛ epo no sɛ, “**Yɛ dinn!**” Mframa no gyaeɛɛ, na epo no yɛɛ dinn!

⁴⁰ Yesu bisaa wɔn sɛ, “**Adɛn na moyɛ ahufɔɔ sei? Adɛn, monnye me nni anaa?**”

⁴¹ Na wɔn ho dwirii wɔn yie, bisabisaa wɔn ho wɔn ho sɛ, “Onipa bɛn ni a mframa ne epo mpo tie no yi?”

5

Yesu Sa Obarima Bi A Owɔ Honhommɔne Yadeɛ

¹ Yesu ne n’asuafoɔ bɛduruu epo no fa baabi wɔ Gerasefoɔ asase so. ² Oresi afiri kodoɔ no mu no, obarima bi a honhommɔne wɔ ne mu

de mmirika firi amusieeē behyiaa no. ³ Na saa ɔbarima yi te amusieeē hɔ. ⁴ Ɔye obi a na ne ho ye den yie enti, se wɔde nkɔnsɔnkɔnsɔn mpo gu ne nsa a, ɔtumi bubu mu a obiara ntumi nkɔ n’anim. ⁵ Anadwo ne awia nyinaa na ɔnenam amusieeē hɔ mmepɔ no mu a, ɔde aboo a ano ye nam twitwa ne ho.

⁶ Ɔbarima yi hunuu Yesu wɔ akyirikyiri no, ɔtuu mmirika, bebuu no nkotodwe. ⁷ Ɔteateaam se, “Yesu, Ɔsorosoro Onyankopɔn no Ba, edeen na wowɔ ne me ye? Mesre wo, enye me ayayadee biara!” ⁸ Yesu tiaa honhommɔne a ewɔ ɔbarima no mu no se, **“Honhommɔne, firi ne mu fi!”**

⁹ Yesu bisaa no se, **“Wɔfre wo sen?”**

Ɔbuaa Yesu se, “Me din de ‘Edɔm’ efiri se, yedɔso.” ¹⁰ Afei, ɔsree Yesu aniberee so se ɔmpam wɔn nkɔ akyirikyiri.

¹¹ Saa eberɛ no, na mprakuo bi redidi wɔ bepɔ no nkyɛn baabi a eben epo no. ¹² Enti, ahonhommɔne no sree Yesu se, “Tu yɛn na yɛnkɔhyɛ mprako no mu.” ¹³ Yesu maa wɔn ho ekwan ma wɔkɔhyɛ mprako no mu. Mprako no de ahɔherɛ sianee bepɔ no kɔguu epo no mu ma efaa wɔn.

¹⁴ Mprakohwefoɔ no dwane baa nkuro a eben hɔ no mu bekaa de wɔahunu no kyerɛ wɔn. Wɔn a wɔtee no kɔhwee dee asie no. ¹⁵ Nnipakuo no duruu baabi a Yesu wɔ no, wɔhunuu ɔbarima a na honhommɔne ahyɛ no ma no se ɔte hɔ dinn a n’adwenem ate no. Yei maa wɔn ho dwirii wɔn. ¹⁶ Wɔn a wɔhunuu asem a asi no ka kyerɛ afoforo, ¹⁷ maa nnipakuo no sree Yesu se, ɔmfiri wɔn nkyɛn nkɔ, na wɔn ho ntɔ wɔn!

18 Enti, osane foro kotenaa kodoɔ no mu. Ɖbarima a na honhommone wɔ ne mu no sɛɛ Yesu sɛ ɔpɛ sɛ ɔne no kɔ. 19 Nanso, Yesu kaa sɛ, “**Dabi, na kɔ na kɔka anwanwadeɛ a Onyankopɔn ayɛ ama wo yi ne n’ahummɔboro ho asem kyere w’abusuafoɔ.**” 20 Enti, ɔbarima no firi hɔ kɔɔ Dekapoli, “Nkuro Edu” no a, ewɔ saa ɔmantam no mu, kɔkaa anwanwadeɛ a Yesu ayɛ ama no no kyereɛ obiara. Wɔtee asem no, wɔn ho dwirii wɔn.

21 Yesu de kodoɔ no tware baa epɔ no fa baabi no, nnipakuo betwaa ne ho hyiaa wɔ mpoano hɔ. 22 Asafopanin bi a na ɔwɔ hɔ a wɔfrɛ no Yairo no, buu Yesu nkotodwe, 23 sɛɛ no sɛ, ɔnsa ne babaa yadeɛ mma no. Ɖfiri ahoyera mu ka kyereɛ Yesu sɛ, “Abɔfra no rewu, enti mesɛ wo sɛ, fa wo nsa beka no na ɔnnya nkwa.” 24 Yesu ne no kɔɛɛ a nnipakuo no di wɔn akyi.

25 Na ɔbaa bi a watu mogya mfirinhyia dumieniu ka nnipakuo no ho. 26 Ɖde ne yadeɛ no akyin ayaresafoɔ bebree so, atua sika bebree ama wayɛ ohiani, nanso na ne ho ntɔ no ara. 27 Na wate anwanwadeɛ a Yesu ayɛ no nyinaa, na eno enti ɔde ne ho fraa nnipakuo no, firii Yesu akyi sɔɔ n’atadeɛ ano. 28 Ɖdweneɛ ho kaa sɛ, “Sɛ metumi nya ne ho ekwan, de me nsa sɔ n’atadeɛ mu kɛkɛ a, me ho betɔ me.” 29 Ampa ara, ɛsɔ a ɔsɔɔ n’atadeɛ no mu pɛ, na mogya no twa maa ne ho tɔɔ no!

30 Amonom hɔ ara, Yesu tee nka sɛ tumi bi afiri ne mu. Ɖdanee ne ho kyereɛ nnipakuo no bisaa sɛ, “**Hwan na ɔsɔɔ m’atadeɛ mu no?**”

³¹ N’asuafoɔ no buaa sɛ, “Saa nnipakuo a obiara de ne ho twitwiri ne yɔnko yi na worebisa sɛ, ‘**Hwan na ɔde ne nsa aka m’atadeɛ?’ ”**

³² Nanso, ɔpɛɛ sɛ ɔhunu onipa ko a ɔsɔɔ n’atadeɛ mu no. ³³ Eberɛ a ɔbaa no hunuu asem a asie no, ɔde ahopopoɔ bebɔu Yesu nkotodwe kaa deɛ ɔyɛɛ no kyerɛɛ no. ³⁴ Yesu ka kyerɛɛ no sɛ, “**Ɔbabaa, wo gyidie ama wo ho ato wo; fa asomdwoeɛ kɔ; wo yadeɛ no agyae.**”

Yairo Babaa No Nyane

³⁵ Ɔgu so rekasa kyere ɔbaa no no, abɔfoɔ firi Yairo efie bebɔɔ amanɛɛ sɛ, Yairo babaa no awu, enti eho nhia sɛ Yesu bebɔa bio.

³⁶ Yesu antie deɛ na wɔreka no koraa, na ɔka kyerɛɛ Yairo sɛ, “**Nsuro, gye di ara.**”

³⁷ Afei, Yesu amma obiara anni n’akyi anko Yairo efie ho gye Petro, Yakobo ne Yohane.

³⁸ Eberɛ a Yesu duruu ho no, ɔhunuu sɛ eho nyinaa aye manyamanya a nnipa retwa agyaadwoɔ.

³⁹ Ɔkɔɔ efie no mu ne wɔn a wɔwɔ ho no kɔkasaeɛ. Ɔbisaa wɔn sɛ, “**Adɛn ne agyaadwotwa ne gyegyeeɛgye yi? Abɔfra no nwuiɛ; nna na wada!**” ⁴⁰ Wɔn a wɔwɔ ho no tee asem a Yesu kae no, wɔsereɛ no.

Yesu ka kyerɛɛ wɔn a wɔwɔ efie ho no sɛ, wɔn nyinaa mfiri adi. Ɔne abɔfra no agya ne ne maame ne n’asuafoɔ baasa no kɔɔ deɛ abɔfra no da ho. ⁴¹ Ɔsɔɔ abɔfra no nsa kaa sɛ, “**Talita, Kumm!**” a aseɛ ne sɛ “**Abaayewa, mese wo sɛ sore!**” ⁴² Amonom ho ara, abaayewa no soreɛɛ, na ɔfiri aseɛ nanteeɛ. Na saa abaayewa no adi mfeɛ dumieniu. Asem a esiie yi maa wɔn ho dwirii wɔn yie. ⁴³ Yesu bɔɔ wɔn ano sɛ

wɔnnka asem a asie no nkyere obiara, na mmom, wɔmma abɔfra no aduane nni.

6

Odiyifoɔ A Ɔnni Animuonyam

¹ Yesu firi baabi a ɔwɔ ho kɔɔ ne kurom a n'asuafoɔ no ka ne ho. ² Ɔkɔɔ hyiadan mu Homeda, hyee aseɛ kyerekyereɛɛ, maa dodoɔ a wɔbetiee no ho dwirii wɔn.

Wobisaa sɛ, "Ehe na saa onipa yi nyaa saa nneɛma yi, edeen nyansa na wɔde ama no a enti ɔtumi ye anwanwadeɛ yi? ³ Enye dua dwumfoɔ ba no ni? Enye Maria babarima a ne nuanom ne Yakobo, Yosef, Yuda ne Simon no nie? Enye yene ne nuammaanom na ete ha!" Na wɔn bo fuu no.

⁴ Yesu ka kyereɛ wɔn sɛ, "**Odiyifoɔ kurom, n'abusuafoɔ mu, ne ne fie na ɔnni animuonyam.**" ⁵ Wantumi anye anwanwadeɛ ahodoɔ wɔ ho, gye ayarefoɔ kakra bi na ɔde ne nsa guu wɔn so, saa wɔn yadeɛ. ⁶ Gye a wɔannye no anni no yee no nwanwa.

Yesu Soma Asuafoɔ Dumieniu No

Na Yesu kyinkyinii nkuraa ase kyerekyereɛɛ. ⁷ Yesu frɛɛ n'asuafoɔ dumieniu no baa ne nkyɛn, na ɔsoma wɔn baanu baanu, maa wɔn tumi wɔ ahonhommɔne so.

⁸ Akwankyerɛ a ɔde maa wɔn nie, "**Mommfa biribiara nkura gye mo poma nko ara; mommfa aduane anaa kotokuo anaa sika.** ⁹ Bio, mommfa mpaboa foforo anaa atadeɛ foforo nka deɛ ehye mo yi ho. ¹⁰ Baabiara a mɔbekɔ no, montena efie baako pɛ mu. Monnsesa mo atenaɛ. ¹¹ Na sɛ morefiri kuro bi a wɔannye anaa wɔantie mo

no mu ako a, momporoporo mo nan ase tutuo, mfa nni adanseɛ.”

¹² Asuafoɔ no kɔkaa asem no kyereɛ obiara a wɔhyiaa no no sɛ ɔnnu ne ho, ntwe ne ho mfiri ne bɔne ho. ¹³ Na wɔtutuu ahonhommone bebree, de ngo sraa ayarefoɔ pii saa wɔn yadeɛ.

Yohane Osubɔni No Kum

¹⁴ Ɔhene Herode tee yei, ɛfiri sɛ na Yesu din atre. Ebinom kaa sɛ, “Yohane Osubɔni no na wasane aba nkwa mu bio, enti na ɔtumi ye anwanwadeɛ a ɔye yi.”

¹⁵ Ebinom nso susuu sɛ, Yesu ye Odiyifoɔ Elia na wasane aba.

Afoforoɔ nso kaa sɛ, odiyifoɔ foforoɔ bi a ɔte sɛ tete adiyifoɔ akeseɛ no bi na waba.

¹⁶ Herode kaa sɛ, “Dabi, ɛye Yohane Osubɔni a metwaa ne ti no. Wanyane afiri owuo mu.”

¹⁷ Saa eberɛ no, na Herode asoma asraafoɔ ma wɔakɔkyere Yohane de no ato afiase, ɛfiri sɛ, na Yohane akasa atia Herode ne Herodia a na ɔye Herode nua Filipo yere no awadeɛ. ¹⁸ Yohane Osubɔni ka kyereɛ Herode sɛ, “Wonni ho ɛkwan sɛ woware wo nua yere.”

¹⁹ Asem a Yohane kaɛɛ no anyɛ Herodia nso de, ma ɔnyaa ne ho menasepɔ kaa sɛ, ɛsɛ sɛ wɔkum Yohane. Nanso, ɔrentumi nku no gye sɛ Herode ama no tumi.

²⁰ Na Herode de obuo ma Yohane, ɛfiri sɛ, na ɔnim sɛ ɔye onipa teneneɛ. Yei enti, ɔbɔɔ ne ho ban. Eberɛ biara a Herode ne Yohane bekasa no, na ne ho yera no, nanso yei nyinaa akyi no, ɔde ntoboaseɛ tie no.

²¹ Deɛ Herodia pɛɛ sɛ enye Yohane no baa mu. Ɛne sɛ, na Herode redi n’awoda, ma ɔtoo ɛpono

wɔ n'ahemfie maa ne mpanimfoɔ, n'asafohene ne Galilea mpanimfoɔ. ²²⁻²³ Herodia babaa besa kyerɛɛ wɔn ma ɛyɛɛ wɔn nyinaa fɛ. Herode de ntamka kyerɛɛ ababaawa no sɛ, "Bisa me biribiara a wɔpɛ; sɛ m'ahemman mu fa mpo na wɔpɛ koraa a, mede bɛma wo!"

²⁴ Ababaawa yi kɔɔ ne maame nkyɛn kɔbisaa no deɛ ɔmmisa, ma ɔka kyerɛɛ no sɛ, "Bisa no Yohane Osubɔni ti!"

²⁵ Ababaawa yi de ahoɔherɛ sane baa ɔhene no nkyɛn bɛka kyerɛɛ no sɛ, "Mɛpɛ sɛ wode Yohane Osubɔni tiri to prɛte mu ma me seesei ara!"

²⁶ Yei maa ɔhene no werɛ hoeɛ, nanso ɛsiane sɛ na waka ntam wɔ nnipa no anim no enti, wammu ɛbɔ a ɔhyɛɛ ne babaa no so. ²⁷ Herode somaa n'asraafoɔ no mu baako sɛ ɔnkɔ afiase ho nkɔtwa Yohane ti mfa mmɛ no. Ɔsraani no kɔtwaa Yohane Osubɔni ti, ²⁸ na ɔde too prɛte mu de brɛɛ ababaawa no maa ɔde kɔmaa ne maame. ²⁹ Ɛberɛ a Yohane asuafoɔ no tee deɛ asi no, wɔbɛfaa n'amu no kɔsɛe no wɔ ɔboda bi mu.

Yesu Ma Nnipa Mpemnum Aduane

³⁰ Asomafoɔ no sane baa Yesu nkyɛn bɛkaa deɛ wɔyɛɛ ne deɛ wɔkyerɛkyerɛɛ nnipa a wɔkɔɔ wɔn nkyɛn no nyinaa kyerɛɛ no. ³¹ Yesu tiee wɔn amanɛɛ no wɛɛɛ no, ɔka kyerɛɛ wɔn sɛ, **"Momma yɛntwe yɛn ho mfiri nnipakuo yi ho, na yɛnkɔhome kakra."** Deɛ ɛma ɔkaa saa ne sɛ, na nnipa a wɔba wɔn nkyɛn no to ntwaa da. Wɔnnya ɛkwan mpo na wɔadidi.

³² Yesu ne n'asuafoɔ no tenaa kodoɔ mu kɔɔ baabi a obiara nni ho. ³³ Nanso, ɛberɛ a wɔrekɔ

no, nnipa pii hunuu wɔn, na wɔtuu mmirika faa mpoano ho kɔhyiaa wɔn. ³⁴ Yei enti, eberɛ a Yesu sii fam no, na nnipakuo ahyia wɔ ho. Ɔhunuu wɔn no, ne yam hyehyee no maa wɔn efiri sɛ, na wɔtɛ sɛ nnwan a wɔnni ɔhwefoo. Ɔkyerɛkyerɛ wɔn nneɛma bebree a esɛ sɛ wɔhunuu.

³⁵ Onwunu reyɛ adwo no, n'asuafoɔ no baa ne nkyɛn, bɛka kyerɛɛ no sɛ, "Adeɛ resa. Aduane biara nso nni ha. ³⁶ Ka kyerɛ nnipa no na wɔnkɔ nkuro mu ne nkuraa a atwa yɛn ho ahyia yi ase, na wɔnkɔɔ aduane bi nni."

³⁷ Yesu ka kyerɛɛ wɔn sɛ, **"Momma wɔn aduane nni."**

Wɔbisaa no sɛ, "Ansa na yɛbetumi ama saa nnipa dodoɔ yi aduane no, esɛ sɛ yɛnya abosome nɔwɔtwe akatua. Sɛ yɛsɛ yɛbɛma wɔn aduane a, yɛrennya saa nnipakuo yi ho sika!"

³⁸ Yesu bisaa wɔn sɛ, **"Burodo ahe na yɛwɔ? Monkɔ na monkohwɛ."**

Wɔsane ba bɛka kyerɛɛ no sɛ, "Wɔwɔ burodo enum ne mpataa mmienu."

³⁹ Afei, Yesu ka kyerɛɛ nnipakuo no sɛ, wɔntenatena ase, na wɔntenatena ase akuakuo wɔ eserɛ no so. ⁴⁰ Enti, wɔntenatena ase akuakuo a ebi yɛ ɔha na ebi yɛ aduonum. ⁴¹ Yesu faa burodo enum ne mpataa mmienu no, na ɔhwɛɛ ɔsoro, bɔɔ mpaɛɛ, hyiraa so. Ɔbubuu burodo no mu de maa asuafoɔ no sɛ wɔnkɛɛ mma nnipa no. Na ɔkyɛɛ mpataa no nso maa wɔn. ⁴² Nnipa no dii aduane no maa obiara meeɛ! ⁴³ Nnipa a wɔdii aduane no beyɛ mmarima mpemnum; ⁴⁴ na wɔtaseɛ aseɛ nkaɛɛ no, eyɛɛ nkentɛmma dumienɛ.

Yesu Nante Nsuo Ani

⁴⁵ Adidie no akyi pɛ, Yesu ka kyereɛ n'asuafoɔ no sɛ, wɔnkɔtena kodoɔ no mu, na wɔnni ɛkan nkɔ Betsaida, na ɔregya nnipakuo no ɛkwan na wati wɔn. ⁴⁶ Akyire yi, ɔkɔɔ bepo no so kɔbɔɔ mpaeɛ.

⁴⁷ Anadwo no a asuafoɔ no te kodoɔ mu aduru nsuo no mfimfini no, na Yesu nko ara na ɔwɔ mpoano. ⁴⁸ Ɔhunuu sɛ na wɔn ho akyere wɔn; ene sɛ, mframa a ano yɛ den ne asoɔkye bo dweradweraa kodoɔ no, enti na wɔrebɛre ɔkodoɔ no hare mu. Anɔpahema beye sɛ nnɔnmiensa bere mu no, ɔnantee nsuo no ani baa wɔn nkyen. Ɔyɛɛ sɛ ɔretwa wɔn ho. ⁴⁹ Ɛbere a asuafoɔ no hunuu obi sɛ ɔnam nsuo no ani no, wɔde ehu teateaam ɛfiri sɛ, na wɔsusu sɛ wɔahunu ɔsaman. ⁵⁰ Wɔn nyinaa hunuu no.

Ɛho ara, Yesu ka kyereɛ wɔn sɛ, **“Momma mo bo ntɔ mo yam. Ɛye me! Monnsuro!”** ⁵¹ Afei, ɔkɔɔ wɔn nkyen wɔ kodoɔ no mu no, mframa no gyaeɛɛ! Asuafoɔ no ho dwirii wɔn, ⁵² ɛfiri sɛ, na wɔnnte aduanema no ase, na wɔapirim wɔn akoma.

Genesaret Ayaresa

⁵³ Wɔtwaa asuo no baa Genesaret na wɔduruu ho no, wɔde kodoɔ no baa mpoano. ⁵⁴ Na wɔsi firii kodoɔ no mu no, nnipa a wɔgyina ho no hunuu no. ⁵⁵ Wɔtuu mmirika kyinii nkuro a atwa ho ahyia no nyinaa so soaa nnipa a wɔyare da wɔn kete so breɛ no wɔ baabiara a wotee sɛ ɔwɔ. ⁵⁶ Na nkuraa ase anaa nkuro so baabiara a ɔkɔreɛ no, wɔde ayarefoɔ beguu mmɔntene so, sreɛ no sɛ, ɔmma wɔmfa wɔn nsa nka n'atadeɛ

ano kekε. Ayarefoɔ dodoɔ a wɔtumi de wɔn nsa kaa n'atadeε ano no ho yeε wɔn den.

7

Honhom Fam Ahotes

¹ Eda bi, Farisifoɔ ne Atwerεsem no akyerεkyerefoɔ binom a wɔfiri Yerusalem baa Yesu nkyen. ² Wɔduruu hɔ no, wɔhunuu sε n'asuafoɔ no bi redidi a wɔanhohoro wɔn nsa ho. ³ Na Yudafoɔ no, ne titire no Farisifoɔ no, nnidi da, gye sε wɔahohoro wɔn nsa ho nyinaa, sɛdeε wɔn amannee kyere, ansa na wɔadidi. ⁴ Na sε wɔfiri dwa so ba a, wɔhohoro wɔn nsa ansa na wɔadidi. Yei ye mmara bebree a wɔfiri tete adi so no mu baako. Na mmara no bi ne sε, wɔhohoro nkuruwa, asen ne nwowa mu.

⁵ Enti, Atwerεsem no akyerεkyerefoɔ no bisaa Yesu sε, “Aden enti na w'asuafoɔ no nni yen amannee a εfiri tete no so? εfiri sε, wɔdidi a, wɔnni ekan nhohoro wɔn nsa sɛdeε amannee kyere no.”

⁶ Yesu buaa wɔn sε, “Mo nyaatwomfoɔ! Asem a Yesaia ka faa mo ho sε,
“Saa nnipa yi de wɔn ano na sdi me ni,
nanso wɔn akoma mmen me ho baabiara no
ye nokore turodoo!

⁷ Wɔsom me kwa;
na wɔn nkyerεkyere ye nnipa nsa ano
mmara’

⁸ Mogya Onyankopɔn mmara a wahyehye no de mo ankasa mo amannee si ananmu.

⁹ “Moahye da sε mobεpo Onyankopɔn mmara no, na moatiatia so, ama mo amannee no atim.

¹⁰ Eho nhwesɔɔ bi ne sε, Mose de Onyankopɔn

mmara a eka se, 'Di w'agya ne wo maame ni' no maa. Ɔkaa se, 'obiara a ɔbekasa atia n'agya anaa ne maame no, ese se wɔkum no.' ¹¹ Nanso, moka se, eye se obi beka akyerɛ n'agya anaa ne maame a adeɛ bi hia no no se, 'Merentumi mmoa mo! Efiri se, mede deɛ anka ese se mede ma mo no ama Onyankopɔn.' ¹² Enti, mobu Onyankopɔn mmara a ɔhyɛɛ no so, sedɛɛ ebeyɛ a mobetumi abɔ mo amanneɛ ho ban. ¹³ Yei ye nhwesɔɔ baako pɛ. Nanso, bebree ka ho."

¹⁴ Afei, Yesu frɛɛ nnipakuo no baa ne nkyɛn, ka kyerɛɛ wɔn se, "Mo nyinaa montie asem a mereka yi yie, na monte aseɛ. ¹⁵ Adeɛ biara a ekɔ onipa mu no, ngu ne ho fi. Na mmom, deɛ ebefiri onipa mu aba no, na egu ne ho fi. ¹⁶ Deɛ ɔwɔ aso a ɔbetie no ntie."

¹⁷ Afei, Yesu firii nnipakuo no mu kɔɔ efie no, n'asuafoɔ no bisaa no asem a ɔkaɛɛ no ase. ¹⁸ Ɔbisaa wɔn se, "Mo nso monte asem a mekaɛɛ no ase? Monhunu se, deɛ modie no ngu mo ho fi anaa? ¹⁹ Efiri se, deɛ modie biara no ne mo akoma nni hwee ye, na mmom, efa ɔyafunu no mu keke."

²⁰ Ɔtoaa so se, "Deɛ efiri onipa mu ba no na egu ne ho fi. ²¹ Afei, deɛ efiri nnipa akoma mu ba no, ede adwamammɔ, korɔno, awudie, ²² adifudepɛ, amumuyɛ, nsisie, ahohwie, anibereɛ, abususem, ahantan ne nkwaseasem ba. ²³ Saa nnebɔne yi nyinaa firi onipa mu na eba, na enonom na egu onipa ho fi a emma ɔmfata Onyankopɔn anim."

Ɔbaa Bi Gyidie

²⁴ Yesu firi ho no, ɔkɔɔ Tiro ne Sidon fam pɛɛ se ɔrekohyɛ ho komm a, obiara nte ne nka, nanso

anyε yie. Eɗa a ɔduruu hɔ ara pε, na nkurofoɔ tee ne nka sε waba hɔ. ²⁵ E hɔ ara na ɔbaa bi a honhommɔne hyε ne babaa ketewa bi mu baa ne nkyen. Na wate Yesu nka enti, ɔbebuu no nkotodwe. ²⁶ ɔbaa no srεε no sε ɔntu saa honhommɔne no mfiri ne ba no mu mma no. Na saa ɔbaa yi yε Helani a wɔwoo no wɔ Siro-Foinike.

²⁷ Yesu ka kyerεε no sε, “E sε sε mma no mee ansa. Na enyε sε wɔde mma aduane ma nkraman.”

²⁸ ɔbaa no nso buaa no sε, “Owura, eyε nokore deε, nanso eyε a, wɔde aduane a aka wɔ mmɔfra no prete mu no bi ma nkraman a wɔhyehyε εpono no ase no.”

²⁹ Yesu ka kyerεε no sε, “Wo mmuaεε pa no enti, masa wo babaa no yadeε. Kɔ efie. Honhommɔne no afiri ne mu afi.”

³⁰ ɔduruu efie no, ɔhunuu sε ne babaa no da mpa so dinn a honhommɔne no afiri ne mu ampa ara.

Mumu Sotifoɔ Bi Ayaresa

³¹ Yesu firi Tiro no, ɔfaa Sidon mansini a emu nkuro yε edu no so, beɗuruu Galilea Po so.

³² Wɔde ɔsotifoɔ bi a ɔsane yε mumu brεε no. Wɔn a wɔwɔ hɔ no nyinaa srεε Yesu sε, ɔmfa ne nsa nka ɔyarefoɔ no, na ɔnsa no yadeε.

³³ Yesu sɔɔ ne mu de no firii nnipakuo no mu. Afei, ɔde ne nsateaa hyεε ɔbarima no asom, tee ntasuo de kaa ne tekrema. ³⁴ ɔhwεε soro, guu ahome teaam sε, “*Hefata!*” A sε ne, “*bue!*”

³⁵ Amonom hɔ ara, ɔbarima no tumi tee asem, na ɔhyεε aseε kasaεε!

³⁶ Yesu bɔɔ nnipakuo no ano sɛ, wɔmmmo asem no dawuro nkyere obiara. Nanso, mpen dodoɔ a ɔbraa wɔn no, na tre ara na wɔn nso wɔretre asem no mu. ³⁷ Saa asem yi maa wɔn ho dwirii wɔn yie. Enti, wɔkaa sɛ, “Yesu aye adee nyinaa yie, ɔma asotifoɔ mpo te asem, na mumu nso kasa!”

8

Nnipa Mpemnan Aduanema

¹ Eɔa koro bi a nnipakuo bi aba Yesu nkyen no, aduane a wɔdi no sae. ² Yesu frɛe n’asuafoɔ ka kyeree wɔn sɛ, “**Nnipa yi ye me mmɔɔ. Wɔɔbedi nnansa wɔ ha a, wɔnni aduane biara a wɔbedi bio.** ³ Sɛ megya wɔn ekwan sɛ wɔnkɔ a wɔnnidiie a, anhwe a na wɔn mu bi atoto baha wɔ ekwan so, efiri sɛ, wɔn mu bi firi akyirikyiri na wɔbae.”

⁴ N’asuafoɔ no bisaa no sɛ, “Ehefa na yɛbenya aduane ama saa nnipa dodoɔ yi wɔ esere yi so ha?”

⁵ ɔbisaa wɔn sɛ, “**Burodo ahe na mowo?**”

Wɔɔbuaa no sɛ, “Yɛwɔ nson.”

⁶ Yesu ka kyeree nnipakuo no sɛ wɔntenatena ase wɔ esere no so. Afei, ɔfaa burodo nson no, na ɔhyiraa so, bubuu mu de maa n’asuafoɔ no ma wɔkye maa nnipa no. ⁷ Na wɔwɔ mpataa kakra wɔ ho, enti Yesu hyiraa eno nso so, de maa asuafoɔ no sɛ wɔnkye eno nso mma wɔn. ⁸ Nnipakuo no didi mee no, ɔgyaa wɔn ekwan. ⁹ Nnipa a wɔdii aduane no dodoɔ beye mpemnan. Na wɔtasee aseɛ nnikaeɛ no, eyee

nkentemma nson. ¹⁰ Yei akyi no, one n'asuafoɔ no kɔtenaa kodoɔ mu baa Dalmanuta fam.

Ɔsoro Nsenkyerennee

¹¹ Farisifoɔ no tee se Yesu aba ho no, wɔbaa ne nkyen bebisabisaa no nsem, de soɔ no hwɛɛ. Wɔka kyereɛ no se, "Ye nsenkyerennee bi kyere yen. Ma nsenkyerennee bi nna adi wɔ ewiem nkyere yen. Eno ansa na yebegye wo adi." ¹² Yesu tee deɛ wɔkaɛ no, ɔguu ahome, ka kyereɛ wɔn se, "**Deen enti na mohwehwe nsenkyerennee daa yi? Nsenkyerennee biara nni ho a meye akyerɛ mo.**" ¹³ Ɔsane kɔtenaa kodoɔ no mu, gyaa wɔn, tware kɔɔ asuogya nohoa.

Herode Ne Farisifoɔ Mmɔka

¹⁴ Asuafoɔ no were firii se wɔfa aduane bi kura ansa na wɔakɔ. Aduane a na wɔkura wɔ kodoɔ no mu no ye burodo baako pɛ. ¹⁵ Wɔretwa asuo no no, Yesu ka kyereɛ wɔn se, "**Monhwe mo ho so yie wɔ Ɔhene Herode ne Farisifoɔ mmɔreka ho.**"

¹⁶ Asuafoɔ no bisabisaa wɔn ho wɔn ho se, "Asem a ɔreka yi ase ne sen?" Deɛ wɔn adwene kyereɛ wɔn ne se, ebia ɔreka aduane a wɔn were firii se wɔbɛfa akuta no ho asem.

¹⁷ Yesu hunuu deɛ wɔdwennwene no, ɔka kyereɛ wɔn se, "**Enye eno ho asem na mereka! Monnte yei ase anaa? Mo akoma da so pirim?**

¹⁸ Mowɔ ani nso monhunu adeɛ? Mowɔ aso nso momfa nte asem? Na monnkae biribi anaa?

¹⁹ Eberɛ a mebubuu burodo enum mu maa nnipa mpemnum no, nnikaɛ nkentemma ahe na motaseɛ?"

Wɔkaa se, "Dumienu."

20 “Na mesane de burodo nson maa nnipa mpemnan no nso, ahe na εκαε?”

Wɔkaa se, “Nkentemma nson.”

21 Ɔbisaa wɔn bio se, “Monnte ase ara anaa?”

Onifirani Bi Ayaresa Wɔ Betsaida

22 Eberɛ a wɔduruu Betsaida no, nnipa bi de onifirani bi brɛɛ no, srɛɛ no se ɔmfa ne nsa nka no, na ɔnsa no yadeɛ. 23 Yesu sɔɔ onifirani yi nsa de no kɔɔ akuraa no kurotia. Ɔtee ntasuo guu onifirani no ani so, na ɔde ne nsa guu no so. Yesu bisaa no se, “Wohunu adeɛ anaa?”

24 Onifirani no maa n’ani so hwɛɛ ɔsoro, buaa se, “Aane, mehunu nnipa! Nanso mehunu wɔn se nnua bi na wɔnenam hɔ.”

25 Afei, Yesu de ne nsa kataa n’ani no so bio. Onifirani no buɛɛ n’ani, na eberɛ a ɔrehwɛ adeɛ haa no, n’ani no yɛɛ yie a afei deɛ na ɔhunu biribiara kann. 26 Yesu ma ɔkɔɔ efie, ka kyerɛɛ no se, “Nsane nkɔ akuraa no ase bio.”

Petro Ka Sɛ Yesu Ne Kristo No

27 Yesu ne n’asuafoɔ no firi Galilea kɔɔ Kaesarea ne Filipi nkuraa ase. Wɔnam ekwan so rekɔ no, ɔbisaa wɔn se, “Nnipa ka se mene hwan?”

28 Asuafoɔ no buaa se, “Ebinom se wone Yohane Osubɔni no, na afoforoɔ nso se woyɛ Elia anaase tete adiyifoɔ no mu bi a wasane aba.”

29 Na ɔbisaa wɔn se, “Na mo nso mose meye hwan?”

Petro buaa no se, “Wone Kristo no.”

30 Ɔbɔɔ wɔn kɔkɔ se, wɔnnka nkyerɛ obiara.

Yesu Hye Ne Owuo Ne Ne Wusɔrɛ Ho Nkom

³¹ Afei, ɔhyee aseɛ ka kyerɛɛ wɔn sɛ Onipa Ba no bɛhunu amane, na mpanimfoɔ, asɔfoɔ mpanin ne Atwerɛsem no akyerɛkyerɛfoɔ no bɛpɔ no, na wɔakum no, na nnansa so, Onipa Ba no bɛsɔre. ³² Ɔkaa asem no pefee a wamfa biribiara ansie wɔn. Petro twee no gyinaa nkyɛn, bisaa no sɛ, “Adɛn enti na woka asem a ɛte sɛɛ yi?”

³³ Yesu danee ne ho hwɛɛ n’asuafoɔ no, kaa Petro anim sɛ, “Firi me so, ɔbonsam! W’adwene ye deɛ ɛfiri onipa na ɛnye deɛ ɛfiri Onyankopɔn.”

Ahopakyire

³⁴ Afei, ɔfrɛɛ n’asuafoɔ no ne nnipakuo no baa ne nkyɛn, ka kyerɛɛ wɔn sɛ wɔmmɛtie no. Ɔka kyerɛɛ wɔn sɛ, “Sɛ obi pɛ sɛ ɔdi m’akyi a, ɛsɛ sɛ ɔpa ne ho akyi, na ɔsoa n’asennua, na ɔdi m’akyi. ³⁵ Deɛ ɔma ne ɔkra som no bo no, ɛbɛfiri ne nsa. Na deɛ me ne Asɛmpa no enti, ɔbɛhwere ne kra no, wɔbɛgye ne nkwa. ³⁶ Na sɛ onipa nya ewiase nyinaa, na ɔhwere ne kra a, mfasoɔ bɛn na ɔbɛnya? ³⁷ Ɛdeɛn na ɛsom bo sene ne kra? ³⁸ Na obiara a saa nna bɔne yi mu n’ani wu me ne me nsem ho no, ne ho bɛye me, Onipa Ba no, aniwu ɛberɛ a me ne m’abɔfoɔ kronkron no bɛsane aba wɔ m’Agya animuonyam mu no.”

9

Yesu Animuonyam Da Adi

¹ Yesu kɔɔ so ka kyerɛɛ n’asuafoɔ no sɛ, “Mo a mogyina ha yi mu bi bɛtena ase akɔsi sɛ mobɛhunu sɛ, Onyankopɔn Ahennie no reba tumi mu!”

² Nnansia akyi, Yesu faa Petro, Yakobo ne Yohane de wɔn kɔɔ bepo tentene bi atifi. Saa eberɛ no, na obiara nni ho ka wɔn ho. Amonom ho ara, Yesu sakyerae animuonyam mu. ³ N'atadeɛ hyerɛn yɛɛ fitafita sene sɛdɛɛ obi bɛtumi ahoro saa atadeɛ no ama ayɛ fitaa no. ⁴ Afei Elia ne Mose bɛfirii ho. Na wɔne Yesu kasaɛɛ!

⁵ Petro ka kyereɛ Yesu sɛ, “Ɔkyerɛkyerɛfoɔ, eyɛ sɛ yɛwɔ ha. Yɛbɛbɔ asese mmiensa wɔ ha, wo dɛɛ baako, Mose dɛɛ baako na Elia dɛɛ baako.”

⁶ Esiane sɛ na wɔabɔ hu no enti na ɛma ɔkaa saa.

⁷ Na omununkum bɛkataa wɔn so. Ɛnne bi firii omununkum no mu kaa sɛ, “Yei ne me Dɔ Ba. Montie no.”

⁸ Preko pɛ, wɔtotoo wɔn ani no, wɔanhunu obiara ka Yesu ho.

⁹ Wɔresiane afiri bepo no so no, Yesu bɔɔ wɔn ano sɛ wɔnnka dɛɛ wɔahunu no nkyere obiara kɔsi sɛ Onipa Ba no bɛsɔre afiri awufoɔ mu.

¹⁰ Asuafoɔ no anka ankyere obiara, na mmom, eyɛ a, na wɔtaa bisabisa wɔn ho wɔn ho sɛ, n'asɛm a ɔkaa sɛ, “Mɛnyane afiri awufoɔ mu” no, na ɔkyere sɛn?

¹¹ Afei, n'asuafoɔ no bisaa no dɛɛ enti a daa mmara no akyerɛkyerɛfoɔ no ka sɛ, ɛsɛ sɛ Elia sane ba ansa na Onipa Ba no aba no.

¹² Yesu gye too mu sɛ, ɛsɛ sɛ Elia di ɛkan ba bɛtoto nneɛma nyinaa yie. Ɔkaa sɛ, **“Ɛnneɛ na aden enti na wɔatwere sɛ Onipa Ba no bɛhunu amane bebree na wɔapo no? ¹³ Nanso me se mo sɛ, Elia aba dada! Na wɔne no anni no yie sɛdɛɛ adiyifoɔ no hyɛɛ ho nkɔm no.”**

Yesu Sa Abarimaa Bi A Ɔwɔ Honhommɔne Yadeɛ

¹⁴ Eberɛ a wɔsiane bɛduruu beɔ no ase ho no, wɔhunuu sɛ nnipakuo atwa asuafoɔ a wɔaka no ho ahyia, na wɔne mmara no akyerɛkyerɛfoɔ no regye wɔn ho wɔn ho akyinnyeɛ. ¹⁵ Eberɛ a nnipakuo no hunuu Yesu no wɔn ho dwirii wɔn, na wɔde mmirika, bɛhyiaa no.

¹⁶ Yesu bisaa wɔn sɛ, **“Akyinnyeɛ a na moregye no fa edeen ho?”**

¹⁷ Nnipa no mu baako kaa sɛ, “Ɔkyerɛkyerɛfoɔ, mede me ba aba ha sɛ sa no yadeɛ. Honhommɔne bi a ɛwɔ ne so enti, ɔntumi nkasa. ¹⁸ Sɛ honhommɔne no ka ne ho wɔ ne mu a, ɛtwa no hwe fam, ma n’ano twa ahuro, ma ɔtwere ne sɛ, ma ɔsensene. Ɛno enti, mesrɛɛ w’asuafoɔ no sɛ wɔntu honhommɔne no mfiri ne mu, nanso wɔantumi.”

¹⁹ Yesu ka kyerɛɛ n’asuafoɔ no sɛ, **“O, mo a mo gyidie sua, me ne mo ntena nkɔsi da ben ansa na mo gyidie atim? Momfa abarimaa no mmrɛ me.”**

²⁰ Wɔde abarimaa no brɛɛ Yesu. Eberɛ a wɔde no duruu Yesu anim pɛ no, yadeɛ no baa dendeenden, twaa no hwee fam, ma ɔperɛe ara a n’ano retwa ahuro.

²¹ Yesu bisaa abarimaa no agya sɛ, **“Nna ahe ni a yadeɛ yi baa ne so?”**

Abarimaa no agya buaa Yesu sɛ, “Ɛfiri ne mmɔfraase pɛɛ; ²² na ɛto ɛda bi koraa a, yadeɛ no tumi twa no hwe ogya anaa nsuo mu, pɛ sɛ ɛkum no. Enti, sɛ wobɛtumi asa no yadeɛ deɛ a, hunu yɛn mmɔbo, na sa no yadeɛ ma yɛn.”

²³ Yesu bisaa no sɛ, “Aden enti na woka sɛ, sɛ metumi a? Nneema nyinaa betumi aye ho ama obiara a ogye die.”

²⁴ Abarimaa no agya buaa sɛ, “Mewo gyidie nanso esua, enti boa me, na hye me gyidie mu den!”

²⁵ Yesu hunuu sɛ nnipa no do ara na woredoo no, oteaa honhommone no sɛ, “Honhommone sotifoɔ ne mumu, mehye wo sɛ, firi abofra yi mu fi. Nkohye ne mu bio!”

²⁶ Afei, yadee no baa dendeenden ansa na efiri ne mu, enti emaa abarimaa no yee sɛ owufoɔ. Enti, nnipakuo no kasaa huhuhuhu sɛ, “Wawu.” ²⁷ Nanso, Yesu soo ne nsa, pagyaa no ma ogyinaa ne nan so a ne ho ato no.

²⁸ Yei akyi a Yesu ne n’asuafoɔ no nko ara wo efie no, wobisaa no sɛ, “Aden enti na yen dee yeantumi antu saa honhommone no?”

²⁹ Yesu buaa won sɛ, “Mpaeebo nko ara na ebetumi atu saa yadee yi.”

Yesu Owuo Ho Nkohye

³⁰ Yesu firii ho no, ofaa Galilea, efiri sɛ, na ompɛ sɛ nnipa te ne nka. ³¹ Na ope sɛ onya bere ma n’asuafoɔ no de kyerekyere won. Oka kyeree won sɛ, “Wobeyi Onipa Ba no ama, na wɔakum no, na ne nnansa so, obesore aba nkwa mu bio.”

³² Asuafoɔ no ante asem a okae yi ase, nanso na wosuro sɛ wobebisa no ase.

Hwan Ne Okese?

³³ Yesu ne n’asuafoɔ no baa Kapernaum. Eberɛ a woduruu efie a wobetena mu no mu na woregye won ahome no, Yesu bisaa n’asuafoɔ no

se, “Yereba no, edeen akyinnyee na na moregye wo ekwan so no?” ³⁴ Asuafoɔ no antumi ammua efiri se, na woredwennwene dee obeye won mu kesee no ho.

³⁵ Otanaa ase, frɛɛ won baa ne nkyɛn, ka kyereɛ won se, “Obiara a ope se oye opanin wo mo mu no, ese se oye abofra anaa osomfoɔ wo mo mu!”

³⁶ Afei, ode abofra ketewa bi begyinaa won mfimfini. Ode abofra no kyereɛ won kaa se, ³⁷ “Mo mu biara a me enti obegye abofra ketewa se yei no, agye me, na dee obegye me no nso agye m’Agya a osomaa me no!”

Dee Ontia Yen No Wo Yen Afa

³⁸ Yohane a oye asuafoɔ no mu baako no ka kyereɛ Yesu se, “Okyerɛkyerɛfoɔ, yehunuu obarima bi a ode wo din retu ahonhommone enti yeka kyereɛ no se onnyae, efiri se, onka yen ho.”

³⁹ Yesu kaa se, “Monnsi no ekwan. Efiri se, obiara nni ho a oreye anwanwadee wo me din mu na obetwa ne ho atia me, ⁴⁰ na obiara a ontia yen no wo yen afa. ⁴¹ Obiara a esiane se, moye Kristo dea no enti, obema mo nsuo kuruwa ma anom no, n’akatua remmo no da.

⁴² “Enti, se obi to mmofra nketewa a wogyɛ me di yi mu bi suntidua a, eye ma no se anka wode eboɔ duruduru besen ne kon mu, ato no atwene epo mu. ⁴³ Se wo nsa ma woye bone a, twa na to twene. Eye ma wo se wode dem beko nkwa mu sene se, wode wo onipadua nyinaa beto amanehunu ogya ⁴⁴ a ennum da no mu. ⁴⁵ Na se wo nan ma woye bone a, twa na to twene. Eye ma wo se wode nansin beko nkwa mu sene

se, wode nan mmienu beko amanehunu ogya ⁴⁶ a ennum da no mu.” ⁴⁷ Na se w’ani ma woye bone a, tu na to twene. Eye ma wo se wode ani baako beko Onyankopon Ahennie mu sene se wowo ani mmienu na wode wo beto amanehunu ogya mu, ⁴⁸ baabi a
 “ ‘ogya no ennum da,

na eho asonsono nso nwu da.’
⁴⁹ Na wode ogya behye won nyinaa nkyene.

⁵⁰ “Nkyene ye de, nanso se nkyene yera ne de a, eho nni mfaso; wonte ne de wo biribiara mu. Enti, monnyera mo de! Mo ne mo ho mo ho ntena asomdwoe mu.”

10

Awaregyaee Ho Asemmisa

¹ Afei, Yesu firii Galilea twa baa Yudea fam no ho wo Asubonten Yordan agya. Nnipakuo baa ne nkyen, na sedee otaa ye no, okyerakyeree won.

² Farisifoo bi baa ne nkyen bebisaa no se, “Wopene awaregyaee so anaa?” Wobisaa no yei de soo no hwee.

³ Yesu nso bisaa won se, “Edeen na Mose ka faa awaregyaee ho?”

⁴ Wobuaa se, “Mose kaa se eye se wogyae awadee. N’asem a okae ne se, se obarima bi pe se ogyaa ne yere awadee a, ontwerere awaregyaee krataa mfa mma ne yere no.”

⁵ Yesu bisaa won se, “Adeh enti na okaa saa? Merebakyere mo dee enti a okaa saa. Esiane mo akoma a apirim no enti na okaa saa kyerere mo. ⁶ Efiri adebo ahyeasee na Onyankopon bo obarima ne obaa. ⁷ Yei enti na obarima begya

n'agya ne ne maame, ⁸ na ɔde ne ho akɔbɔ ne yere ho, na wɔn baanu no aye honam korɔ. ⁹ Na deɛ Onyankopɔn aka abom no, enɛ sɛ onipa tete mu.”

¹⁰ Akyire no a ɔne n'asuafoɔ no wɔ efie no, asuafoɔ no bisaa no saa asem korɔ no ara bio. ¹¹ Ɔbuaa wɔn sɛ, “Sɛ obi gyaa ne yere awadeɛ na ɔsane ware obi foforo a, na wabɔ adwaman. ¹² Na sɛ ɔyere gyaa ne kunu awadeɛ, na ɔsane ware a, ɔno nso abɔ adwaman saa ara.”

Yesu Hyira Mmɔfra Nkumaa

¹³ Ɛda bi, awoforo bi de mmɔfra nkumaa brɛɛ Yesu sɛ ɔnhyira wɔn, nanso n'asuafoɔ no pampam wɔn a wɔde mmɔfra no baeɛ no, ka kyerɛɛ wɔn sɛ, wɔnnha no. ¹⁴ Yesu hunuu deɛ n'asuafoɔ no aye no, anyɛ no de na ɔka kyerɛɛ wɔn sɛ, “Mamma mmɔfra no ekwan na wɔmmra me nkyɛn, na monnsi wɔn ekwan, na yeinom sei na Onyankopɔn Ahennie no ye wɔn dea. ¹⁵ Mereka akyere mo sɛ, obiara a ɔrennye Onyankopɔn Ahennie no sɛ abɔfra no, ɔrentumi nhyene mu.” ¹⁶ Na ɔyɛɛ wɔn atuu, de ne nsa guu wɔn so, hyiraa wɔn.

Aberantɛ Sikani No

¹⁷ Na ɔsiim sɛ ɔreko baabi foforo no, ɔbarima bi tutuu mmirika baa ne nkyɛn bebuu no nko-todwe, bisaa no sɛ, “Ɔkyerɛkyerɛfoɔ pa, Ɛdeen na menyɛ na manya nkwa a enni awieɛ?”

¹⁸ Yesu bisaa no sɛ, “Aden na wofrɛ me onipa pa? Obiara nyɛ onipa papa gye ɔbaako; ɔne Onyankopɔn. ¹⁹ Ɛfa w'asemmisa no ho nso,

wonim mmaransem no: Nni awu, mmɔ adwaman, mmɔ korɔno, nni atorɔ, nsisi, di w'agya ne wo maame ni."

²⁰ Aberanteɛ no ka kyerɛɛ no sɛ, "Ɔkyerɛkyerɛfoɔ, yeinom nyinaa mefiri me mmɔfraase na medii so."

²¹ Yesu hwɛɛ aberanteɛ yi dinn, nyaa ɔɔɔ bi maa no. Ɔka kyerɛɛ no sɛ, "Aka wo adeɛ baako. Ko na kɔtɔn biribiara a wowɔ, na fa sika no ma ahiafoɔ, na wobɛnya agyapadeɛ wɔ ɔsoro, na bra beɔdi m'akyi."

²² Aberanteɛ no tee saa asem yi no, n'anɛm sesaɛ, na ɔde awerɛhoɔ kɔɛɛ, ɛfiri sɛ, na ɔwɔ ahonyadeɛ bebree.

²³ Ɔreko no, Yesu hwɛɛ no na ɔdaneɛ ne ho ka kyerɛɛ n'asuafoɔ no sɛ, "Ɛye den ma osikani sɛ ɔbɛko Onyankopɔn Ahennie no mu!"

²⁴ Asem a Yesu kaɛɛ no maa asuafoɔ no ho dwirii wɔn. Yesu sane kaa bio sɛ, "Me mma, sɛ moahunu den a ɛye ma wɔn a wɔwɔ ahonyadeɛ sɛ wɔbɛko Onyankopɔn Ahennie mu? ²⁵ Na ɛye mmere sɛ yoma befa paneɛ aniwa mu sene sɛ osikani beko Onyankopɔn Ahennie mu."

²⁶ Asuafoɔ no ho dwiri wɔn mmorosɔɔ na wɔbisaa no sɛ, "Ennee na hwan na wɔbɛgye no nkwa?"

²⁷ Yesu hwɛɛ wɔn dinn kaa sɛ, "Onipa fam deɛ, yei rentumi mma mu, na Onyankopɔn fam deɛ, biribiara beɔtumi aba mu."

Yesu Akyiridie Mu Akatua

²⁸ Afei, Petro hyɛɛ aseɛ kenkanee nneɛma a ɔne asuafoɔ no agya abɛdi Yesu akyi. Ɔkaa sɛ, "Yeagya biribiara abɛdi w'akyi."

²⁹ Yesu nso buaa no se, “Merema mo ate ase se, obi nni ho a, me enti wagya efie, nuamarimanom, nuammaanom, maame, agya ne mma anaase agyapadee a obeko akoka Asempa no, ³⁰ na orennya efie, nuammarimanom, nuammaanom, maamenom, mma ne nsase mmoho oha a otaa nso ka ho! Yeinom nyinaa beye ne dea wo asase yi so, na ewiase a ereba no mu de, obenya nkwa a enni awiee. ³¹ Na adikanfo pii bedi akyire, na akyikafo abedi ekan.”

Yesu Owuo Ne Ne Wusoree Ho Nkomhye A Eto So Mmiensa

³² Afei, wosim se woreko Yerusalem a na Yesu di won ekan; na ebera a asuafon no di n'akyi no, ehu ne suro kaa won. Yesu twee won gyinaa nkyen, na osane kaa nneema a, se woduru Yerusalem a, ebeba ne so no nyinaa kyerere won. ³³ Oka kyerere won se, “Se yeduru ho a, wobeyi me, Onipa Ba no ama asofon mpanin ne Atweresem no akyerekyerefon, na wabu me kumfo, na wode me ahye Roma aban nsa, na wakum me. ³⁴ Wobedi me ho few, na wotete ntasuo agu me so, na wode mpire atwa me mmaa, na wakum me, na nnansa so no, masore bio.”

Yakobo Ne Yohane Abisades

³⁵ Afei, Sebedeo mma Yakobo ne Yohane baa Yesu nkyen beka kyerere no se, “Okyerekyerefon, yere se woye yen adoe bi.”

³⁶ Yesu bisaa won se, “Edeen na mope se meye ma mo?”

³⁷ Wobuaa se, “Ma yen mu baako ntena wo nifa so, na obaako nso ntena wo benkum so wo w’ahennie mu ho!”

³⁸ Nanso, Yesu maa won mmuaee se, “**Monnim dee mobisa no! Mobetumi anom awerehoɔ kuruwa nwononwono a ese se menom ano no anaa? Anaase, mobetumi ama wode amanehunu asubo no abo mo asu?”**

³⁹ Wɔka kyerɛe no se, “Yeбетumi!”

Na Yesu ka kyerɛe won se, “**Mobetumi anom me kuruwa ano, na wode asubo a wode bo me no abo mo; ⁴⁰ nanso menni tumi se meyi won a wobetena me nifa anaa me benkum so no. Onyankopɔn nko ara na ode saa afa no bema won a wɔasiesie ho ama won no.”**

⁴¹ Asuafoɔ a aka no tee deɛ Yakobo ne Yohane kobisaee no, anye won de. ⁴² Enti, Yesu frɛe won ka kyerɛe won se, “**Monim se ahene ne atumfoɔ a wɔwɔ ewiase no di won a wɔhye won ase no so, ⁴³ nanso mo deɛ, ente saa wo mo ho. Obiara a ɔpe se ɔye kese wo mo mu no, ese se ɔye mo ɔsomfoɔ. ⁴⁴ Na obiara a ɔpe se ɔye ne nuanom so panin no ese se ɔye won nyinaa akoo. ⁴⁵ Me a meye Onipa Ba no, mamma se wɔnsom me na mmom, mebaee se merebeboa afoforo, na mede me kra aye mpata ama nnipa pii.”**

Onifirani Bi Akehunu

⁴⁶ Yesu ne n’asuafoɔ no beduruu Yeriko. Wɔrefi kuro no mu no, nnipakuo tu dii won akyi. Saa eberɛ a Yesu retwa mu no, na onifirani Bartimeo a ne din nkyerɛaseɛ ne “Timoteo ba” no te kwankyɛn resresɛ adeɛ. ⁴⁷ Eberɛ a Bartimeo tee se Yesu Nasareni na ɔretwam no,

ϕhyεε aseε teateaam se, “Dawid Ba Yesu, hunu me mmɔbɔ!”

⁴⁸ Nnipa no bi teatea no se, “Mua w’ano!” Nanso ɔkɔ so teateaam denden se, “Dawid ba, hunu me mmɔbɔ!”

⁴⁹ Eberε a Yesu tee ne nne no, ɔgyina kaa se, **“Momfrε no mma me.”**

Wɔfrεε onifirani no ka kyerεε no se, “Ma wo bo ntɔ wo yam, sɔre na ɔrefrε wo!” ⁵⁰ Bartimeo to ne ntoma guie, sɔre baa Yesu nkyεn.

⁵¹ Yesu bisaa no se, **“Edeen na wɔpe se meye mema wo?”**

Onifirani no buaa se, “Ɔkyerεkyerεfoɔ, mepε se mehunu adeε!”

⁵² Yesu ka kyerεε no se, **“Kɔ, na wo gyidie agye wo.”** Na ntεm ara onifirani no hunuu adeε, na ɔdii Yesu akyi.

11

Yesu Kɔ Yerusalem

¹ Yesu ne n’asuafoɔ no rebɛn Yerusalem, na wɔduruu Betfage ne Betania a εwɔ Ngo Bepɔ no ho no, Yesu somaa n’asuafoɔ no mu baanu, dii wɔn anim εkan. ² Yesu ka kyerεε wɔn se,

“Monkɔ akuraa a εwɔ hɔ no ase. Se moduru hɔ a, mɔbehunu se wɔasa afunumu ba bi a wɔntenaa ne so da ahoma. Monsane no, na momfa no mmre me. ³ Na se obi bisa mo se edeen na moreye a, monka no tiawa se, ‘Ne ho hia Awurade, na ɔbesane de no aba seesei ara.’”

⁴ Asuafoɔ baanu no siim. Wɔkɔhunu se aboa no sa efie bi aboboano. Enti, wɔsanee no. ⁵ Wɔgu so resane no no, nnipa bi a wɔgyina nkyεn bisaa wɔn se, “Aden enti na moresane afunumu ba

no?" ⁶ Wɔkaa asem a Yesu ka kyerɛɛ wɔn no kyerɛɛ nnipa no ma wɔtee wɔn aseɛ. ⁷ Wɔde afunumu ba no brɛɛ Yesu, maa asuafoɔ no de wɔn ntoma guu aboa no so, maa Yesu tenaa ne so. ⁸ Nnipakuo a wɔwɔ hɔ no bi de wɔn ntoma sesɛɛ ekwan a ɔde aboa no nam so no so. Ebinom nso pempan nnua mman de sesɛɛ ekwan no mu saa ara. ⁹ Na Yesu di nnipakuo no mfimfini a wɔn nyinaa reteateam sɛ,
 "Hosiana!"*

"Nhyira ne deɛ ɔnam Awurade din mu reba!"

¹⁰ "Animuonyam nka Onyankopɔn sɛ yen agya Dawid ahennie reba."

"Hosiana wɔ ɔsorosoro!"

¹¹ Yesu kɔduruu Yerusalem no, ɔkɔɔ asɔredan no mu. Ɔhwɛɛ biribiara a ɛwɔ hɔ dinn ansa na ɔrefiri hɔ, ɛfiri sɛ, na onwunu redwo enti ɔne asuafoɔ dumieniu no kɔɔ Betania.

Yesu Dome Ankaa Dua

¹² Adeɛ kyee anɔpa a wɔrefiri Betania hɔ no, ɛkɔm dee no. ¹³ Wɔkɔɔ kakra no, ɔhunuu sɛ borɔɔɔma dua bi si hɔ a ayɛ kusuu. Ɔkɔɔ hɔ kɔhwɛɛ sɛ aduaba no bi wɔ so anaa. Nanso, ɔduruu hɔ no, ɔhunuu sɛ nhahan nko ara na ɛwɔ so. Saa ɛbere no nso, na ɛnye ɛbere a ɛsɛ sɛ borɔɔɔma no so. ¹⁴ Nanso, Yesu domee borɔɔɔma dua no sɛ, "**Ɛfiri ɛnnɛ, worenso aba bio!**" Asuafoɔ no tee asem a ɔkaɛɛ no.

Yesu Kɔ Asɔrefie

* **11:9** 11.9 Nkamfo

¹⁵ Yesu sane baa Yerusalem no, ɔkɔɔ asɔrefie hɔ. Ɔduruu hɔ no, ɔpamoo adwadifoɔ a wɔwɔ hɔ no nyinaa, kaa sikasesafoɔ apono nyinaa guu fam, bubuu pata a wɔtɔn mmorɔnoma wɔ mu no nyinaa, ¹⁶ sii ekwan se obiara mmedi dwa wɔ hɔ bio. ¹⁷ Ɔka kyerɛɛ wɔn se, **“Atwerɛsem no ka se, ‘M’asɔrefie ye beaɛɛ a wɔbɔ mpaɛɛ,’ nanso mo deɛ, mode hɔ aye akorɔmfoɔ atenaɛɛ.”**

¹⁸ Asɔfoɔ mpanin ne Yudafoɔ mpanimfoɔ tee deɛ Yesu aye no, wɔbɔɔ ne ho pɔ, pɛɛ ekwan a wɔbɛfa so ayi no afiri hɔ. Asem a na ɛha wɔn ne se, se wɔanhwe no yie nso a, ɛde basabasa beba, ɛfiri se, na nnipa bebree agye Yesu nkyerɛkyere no atom.

¹⁹ Sɛdeɛ na wɔtaa ye no, anwummere no ara, wɔfirii kuro no mu.

Borɔɔɔma Dua A Ɛwuiɛ No

²⁰ Anɔpa a asuafoɔ no retwam wɔ borɔɔɔma dua a Yesu domee no no ho no, wohunuu se awu.

²¹ Petro kaeɛ asem a Yesu ka de domee dua no no, ɔteaam se, “Hwe, Ɔkyerɛkyerefoɔ! Borɔɔɔma dua a wodomee no no awu!”

²² Yesu nso ka kyerɛɛ n’asuafoɔ no se, **“Se mowɔ gyidie wɔ Onyankopɔn mu a, ²³ anka mobɛtumi aka akyere Ngo Bepɔ yi se, ‘Tutu kɔgu ɛpo mu,’ na ɛbetutu akɔgu mu nso. Monnye nni; mommma mo gyidie nhinim. ²⁴ Montie deɛ mereka yi. Biribiara a mobɛbisa wɔ mpaɛɛbɔ mu no, monnye nni se mo nsa aka, na ɛbeyɛ hɔ ama mo. ²⁵ Na se morebɔ mpaɛɛ a, deɛ ɛdi ekan no, se mowɔ obi ho asem a, momfa nkyɛ no sɛdeɛ ɛbeyɛ a mo Agya a ɔwɔ ɔsoro no nso de mo bone bekyɛ mo. ²⁶ Na se moamfa bone ankyɛ a, saa**

ara na mo Agya a ɔwɔ ɔsoro no nso remfa mo bɔne nkye mo.”

Yesu Tumi Ho Nsemmisa

²⁷ Wɔbaa Yerusalem bio. Wɔkɔɔ asɔrefie ho no, asɔfoɔ mpanin ne Yudafoɔ mpanin baa ne nkyen bebisaa no se, ²⁸ “Tumi ben na wogyinaa so pamoo adwadifoɔ no?”

²⁹ Yesu nso buaa wɔn se, “Merebebisaa mo asem baako bi na mommua me! ³⁰ Onyankopɔn na ɔsoma Yohane Osubɔni, anaa enye ɔno? Mommua me!”

³¹ Wɔdwennwenee ho kaa se, “Se yeka se, ‘Onyankopɔn na ɔsoma no a,’ wɔbebisaa yen deɛ enti a yeanye deɛ Yohane kaeɛ no anni. ³² Na se yeka se, ‘Enye Onyankopɔn na ɔsoma no nso a,’ eɔm no beha yen. Efiri se, wɔn nyinaa nim se Yohane ye odiyifoɔ.”

³³ Enti, wɔn mmuaɛɛ a wɔmaɛɛ ara ne se, “Yerentumi mmua. Yennim.”

Eho ara na Yesu nso ka kyereɛ wɔn se, “Se monnim de a, me nso meremma mo asemmisa no ho mmuaɛɛ!”

12

Bobeturo Mu Akuafɔ Bi

¹ Yesu nam mmebuo so kyereɛ nnipa no se: “Eɔa bi, okuafɔ bi yeɛ bobefuo, gyee ban faa ho, na ɔtuu amena bi a wɔkyi bobɛ mu nsuo wɔ mu, na ɔsii ɔwen aban wɔ mu. Afei, ɔde afuo no gyaa akuafɔ bi, na ɔtuu ekwan. ² Eduruu eberɛ a bobɛ no bereɛɛ a eɛ se wɔte no, ɔsoma ne ho onipa bi se ɔnkɔgye ne kyefa mmɛ no. ³ Nanso, akuafɔ no boroo no, ma ɔde ne nsapan sane

ƙƙεε. ⁴ Okuafoɔ no sane somaa onipa foforoɔ ƙƙɔ wɔn nkyɛn, na ɔno nso, wɔboroo no, pirapiraa no sene deɛ ɔdi ekan no. ⁵ Onipa a ɔsomaɔ no bio no deɛ, wɔkumm no. Afoforoɔ a akyire no wɔkɔɛ no nso, wɔhwee ebinom, na wɔkumm ebinom nso.

⁶ “Nanso, na aka ɔbaako a ɔye ne ba a ɔɔɔ no. Ɔsomaɔ ɔno nso ƙƙɔ wɔn nkyɛn, susuu se wɔɛfere no de anidie ama no.

⁷ “Nanso, eberɛ a akuafoɔ no hunuu no se ɔreba no, wɔkaa se, ‘Ɔdedifoɔ no na ɔreba no. Momma yenkum no, na agyapadeɛ no aye yen dea!’ ⁸ Wɔkyeree no, kumm no, twee no firii bobɛ turom ho ƙɔtoɔ no tweneɛ baabi.

⁹ “Mogyɛ di se, se afu wura no ba a eɛɛn na ɔɛye akuafoɔ no? Ɔɛɛba abɛkum wɔn, na ɔɔɛ afuo no ama nnipa foforoɔ. ¹⁰ Monnkaneɛ yei wɔ Atwerɛsem no mu pɛn se:

“‘Eboɔ a adansifoɔ apo no,
ɛno ara na abɛye ɛɛn no ntweaso tiboo;

¹¹ Awurade na wayɛ yei,
na eyɛ nwanwa wɔ yen ani so?’ ”

¹² Na ɛsiane saa bɛ a ɔɔɛɛ no enti, Yudafoɔ mpanin no pɛɛ se wɔkyere no, ɛfiri se, wohunuu se wɔn ho asem na ɔreka no a ɛkyere se, wɔne saa akuafoɔ atirimuɔɔdenfoɔ no. Nanso na wɔsuro ɔɔm no. Yeɛ ma wɔgyaɛɛ no, na wɔfirii ho ƙƙεε.

Etoɔ Gyeɛ Ho Asemmisa

¹³ Wɔsomaɔ Farisifoɔ ne Herodefɔɔ bi baa Yesu nkyɛn se wɔne no mmekasa, na wɔnam n’anom asem so anya no akyere no. ¹⁴ Wɔbisaa no se, “Ɔkyerekyerefoɔ, yenim se woyɛ ɔnokwafɔɔ

a, wotaa ka nokore. Dee onipa ka no ntumi nnane w'adwene. Afei, wokyerɛkyerɛ nnipa Onyankopɔn akwan. Yɛpɛ sɛ yɛbisa wo sɛ, eyɛ sɛ wɔyi toɔ ma Roma Hemɔn Kaesare* anaa enyɛ?"

¹⁵ Yesu hunuu wɔn adwemmɔne no kaa sɛ, "Aɔn enti na mosɔ me hwɛ, momfa sika a wɔde yi toɔ no bi nkyerɛ me, na mɛma mo mmuaɛ."

¹⁶ Wɔde maa no, ɔbisaa wɔn sɛ, "Hwan mfonɛ ne atwerɛ na ɛwɔ so?"

Wɔɔbuaa sɛ, "Kaesare deɛ."

¹⁷ Yesu ka kyerɛɛ wɔn sɛ, "Ennɛɛ momfa Kaesare deɛ mma no, na momfa Onyankopɔn deɛ mma Onyankopɔn!"

Ne mmuaɛɛ no maa wɔn ho dwirii wɔn.

Owusɔrɛ Ho Asemɛmisa

¹⁸ Afei, Sadukifoɔ a wɔka sɛ owusɔrɛɛ nni ho no, baa ne nkyɛn bebisaa no sɛ,

¹⁹ "Ɔkyerɛkyerɛfoɔ, Mose yɛɛ mmara maa yɛn sɛ, sɛ ɔbarima bi anwo na ɔwu a, ne nuabarima mfa ne yere no kunabaa na ɔne no nwo mma mma owufoɔ no. ²⁰ Anuanom baason bi tenaa ase. Dee ɔdi ɛkan no waree yere, na ɔne no anwo na ɔwuiɛ. ²¹ Na deɛ ɔto so mmienu no nso waree okunafoɔ no, na ɔno nso, ankyerɛ na ɔwuiɛ a ɔne no anwo. Na deɛ ɔto so mmiɛnsa no nso waree no a, ɔne no anwo na ɔwuiɛ. ²² Yei kɔɔ so kɔsɛi sɛ, anuanom yi nyinaa waree ɔbaa no, na ɔbaa no nso wuiɛ. ²³ Dee yɛpɛ sɛ yɛhunu ne sɛ, owusɔrɛɛ

* **12:14** 12.14 Na eyɛ asedɛɛ sɛ ɔmanfoɔ tua toɔ ma Romahene. Na togyɛɛ nso ani koraa enti Yudafoɔ no bi ampe sɛ wobɛtua, ɛfiri sɛ, na wɔgyɛ di sɛ etoɔ no tua no na enyɛ Roma den ma wɔdi ɔman no so.

no mu, se wonya sore a, won mu hwan na obaa no beye ne yere?"

²⁴ Yesu buaa won se, "Mo mfomsoo a moye no firi nim a monnim Atweresem no, ne Onyankopon tumi a owo. ²⁵ Se anuanom baason yi ne obaa no sore firi awufooo mu a, worenware; wobeye se abofooo a wowo osoro no. ²⁶ Afei, efa awufooo owusoree no ho no nso, monnkane Mose nwoma no mu asem a efa Mose ne wira a na erehyee no ho da? Onyankopon ka kyeree Mose se, 'Mene Abraham Onyankopon, Isak Onyankopon ne Yakob Onyankopon.' ²⁷ Na Onyankopon reka akyere Mose se, ewom se, saa nnipa yi awuwu mfee pii a atwam no dee, nanso wote ase. Anye saa a anka orenka se oye atasefooo Onyankopon, na onye awufooo Onyankopon. Moaye mfomsoo kesee."

²⁸ Atweresem no akyerekyerefoo no mu baako a ogyina ho retie no no hunuu se, wabua won sedee efata no, obisaa no se, "Mose mmaranssem no mu dee ewo he na ekyen ne nyinaa?"

²⁹ Yesu buaa no se, "Dee ekyen ne nyinaa ne dee eka se, 'Israel, tie! Awurade, yen Onyankopon, ye Awurade koro; ³⁰ na do Awurade wo Onyankopon firi w'akoma ne wo kra ne w'adwene ne w'ahooden nyinaa mu,' no. ³¹ Na dee eto so mmieniu no ne: 'Do wo yonko se wo ho.' Mmaranssem bi nni ho a ekyen eyinom."

³² Atweresem no okyerekyerefoo no buaa no se, "Owura, woaka nokore se, Onyankopon baako pe na owo ho, na obi foforo nka ne ho, ³³ na menim nso se, se medo no afiri m'akoma ne m'adwene ne m'ahooden nyinaa mu, na medo

me yonko se me ho no, sene afodee biara a wobɔ.”

³⁴ Yesu hunuu se wabua asem no nyansa mu no, oka kyeree no se, “**Wo ne Onyankopon Ahennie ntam ekwan nware.**” Na saa asem yi akyi, obi antumi ammisa no asem biara bio.

Onipa Ba No Ho Asemmisa

³⁵ Eberɛ bi a Yesu rekyerekyere wɔ asɔredan mu no, obisaa nnipa no se, “**Aden na Atweresem no akyerekyerɛfoɔ no ka se, esɛ se Agyenkwa no ye Ɔhene Dawid ba?** ³⁶ Efiri se Dawid ankasa nam Honhom Kronkron mu kaa se, “‘Awurade ka kyerɛ me wura se:

“Tena me nifa so
kɔsi se mede w’atamfoɔ
beyɛ wo nan ntiasɔ.”’

³⁷ Se Dawid frɛ no ‘Awurade’ a, ebeyɛ den na watumi ayɛ ne ba?”

Ekwan a ɔfaa so kasaeɛ no maa nnipa no de anigyɛ tie no.

Atwerɛfoɔ No Kɔkɔbɔ

³⁸ Eberɛ bi a nnipakuo bi de anigyɛ retie Yesu no, oka kyerɛ wɔn se, “**Monhwɛ mo ho yie wɔ Atweresem no akyerekyerɛfoɔ ho! Wɔhyɛ ntadeɛ akeseɛ se asikafoɔ na se wɔnam badwa mu a, wɔpɛ se obiara a ɔhyia wɔn no de obuo kyea wɔn.** ³⁹ Se wɔkɔ hyiadan mu a, wɔtenatena mpanin adwa so, na se wɔkɔ adidie ase a, wɔtena mpanin tenabea. ⁴⁰ Wɔbɔ mpaɛɛ hunu atentene kyere nnipa se wɔresom Onyankopon, nanso wɔsisi akunafoɔ. Yei enti wobɛnya asotwe a emu ye duru.”

Ɔbaa Kunafoɔ Hiani Bi

⁴¹ Eɔa bi a Yesu kɔɔ asɔredan mu no, ɔkɔtenaa afɔrebɔ adaka a esi hɔ no anim hwɛɛ sɛdɛɛ nkurofoɔ no de sika regu adaka no mu. Asikafoɔ no de sika a ɛdɔɔso guu mu. ⁴² Ɔbaa kunafoɔ hiani bi nso baɛɛ na ɔde sika nketewa mmieniu bɛguu mu.

⁴³ Ɔfrɛɛ n'asuafoɔ no baa ne nkyɛn ka kyerɛɛ wɔn sɛ, "Saa ɔbaa kunafoɔ hiani yi afɔdɛɛ a ɔbɔɛɛ no som bo sene afɔdɛɛ akɛsɛakɛsɛɛ a asikafoɔ no bɛbɔɛɛ no nyinaa. ⁴⁴ Na wɔn nyinaa firi dɛɛ wɔanya ama abu wɔn so no mu na wɔyiyii bi de baɛɛ, na ɔbaa yi dɛɛ, ɔfiri ne hia mu de dɛɛ ɔwɔ nyinaa na abegu mu no."

13

Asɔredan No Sɛɛ

¹ Yesu refiri asɔredan no mu hɔ no, n'asuafoɔ no mu baako kaa sɛ, "Ɔkyerɛkyerɛfoɔ, adan yi ye fɛ papa. Hwɛ sɛdɛɛ wɔde abɔɔ asiesie afasuo no."

² Yesu ka kyerɛɛ no sɛ, "Eye nokore dɛɛ, nanso wɔbɛdwiri saa ɛdan yi agu pasaa."

³ Eberɛ a ɔte Ngo Bepɔ no so a n'ani tua Yerusalem no, Petro, Yakobo, Yohane ne Andrea baa ne nkyɛn bɛbisaa no sɛ, ⁴ "Eberɛ bɛn na dɛɛ woreka fa asɔredan yi ho no bɛba mu. Na nsenkyerɛnɛɛ bi bedi ɛkan aba ansa anaa?"

⁵ Yesu buaa wɔn sɛ, "Monhwɛ yie na obi annaadaa mo. ⁶ Nnipa bebree de me din bɛba abɛka sɛ wɔne Agyenkwa no, na wɔadaadaa mo mu pii. ⁷ Akokoakoko besisi afanan nyinaa, nanso ɛnye ɛnonom ne awieɛɛ no ho

nsenkyerennee. ⁸ Aman besore aman so, na ahennie asore ahennie so na asasewosoɔ ne ekom beba mmeamma. Yeinom nyinaa beye nneema a eye hu a ebeba no mfitiasee.

⁹ “Nanso, se yeyinom fiti aseɛ se ereba a, monhwe yie! Mobeke ohaw akeseɛ mu. Esiane se modi m’akyi enti, wobetwe mo ako asenniie; wobehwe mo wo asoredan mu, na woaka nsem agu mo so wo ahemfo ne mpanimfoɔ anim. Saa eberɛ no ne berɛ pa a ese se moka Asempa no kyere won. ¹⁰ Na ese se Asempa no di ekan duru oman biara so ansa na awieeɛ no aba. ¹¹ Na se wokyerɛ mo de mo begyina asenniie a, monnnwene deɛ mobeke de ayi mo ho ano ho. Monka deɛ Onyankopɔn bekyere mo se monka no. Na enye mo na mobekeɛ, na Honhom Kronkron no na obekyerɛ mo deɛ monka.

¹² “Onua beyi onua ama se woakum no. Saa ara na agyanom nso beyi won mma ama. Mma besore atia won awofɔɔ ama woakum won. ¹³ Me enti, nnipa nyinaa betan mo. Nanso, deɛ obetumi agyina pintinn akɔsi awieeɛ no, wobegye no nkwa.

¹⁴ “Enti, se mohunu akyiwadeɛ a ebo oman wo asoredan mu ho a, okenkanfoɔ, hwe yie! Won a wɔwɔ Yudea no nnwane nko mmepɔ no so. ¹⁵ Won a wɔwɔ won afie mu no nnwane a wonnsane nko efie ho bio nkɔfa biribiara mmfiri ho. ¹⁶ Won a wɔwɔ mfuom no nso nnsane won akyi mmefa sika anaa ntoma wo efie. ¹⁷ Na won a wɔafa afuro ne won a wɔturu mma saa eberɛ no mu no nnue. ¹⁸ Na mommo mpaɛɛ na eberɛ a ese se modwane no anye awoberɛ. ¹⁹ Na ahohia a ebeba saa mmere no mu no, efiri eberɛ

a Onyankopon boɔ adeɛ no, ebi nsii da, na ebi nso rensi da.

²⁰ “Gye sɛ Awurade twa saa amanehunu no so, anyɛ saa a, ɔkra baako koraa rentena ase. Nanso, esiane wɔn a wɔayi wɔn no enti, ɔbetwa nna no so. ²¹ Na sɛ obi ka kyere mo sɛ, ‘Agyenkwa no ni’ a, mommua. ²² Atoro Kristo ne atoro adiyifoɔ besore wɔ mo mu, na wɔayɛ anwanwadeɛ ahodoɔ, na sɛ ɛbetumi a, wɔadaadaa Onyankopon no ara ankasa mma. ²³ Monhwɛ yie, ɛfiri sɛ, maka biribiara akyere mo!

²⁴ “Ahohia no akyi no,

“ ‘owia beduru sum,

na ɔsrane renhyeren,

²⁵ na nsoromma betete ahwe,

na wɔbewoso tumi a ɛwɔ ewiem no.’

²⁶ “Na nnipa nyinaa behunu me, Agyenkwa no, sɛ mede tumi ne animuonyam nam omununkum mu reba. ²⁷ Na mesoma m’abɔfoɔ ako ewiase afanan nyinaa, firi ɔsoro ano akɔka asase ano, na wɔabeboaboa wɔn a mayi wɔn no ano.

²⁸ “Afei, monsua biribi mfiri borɔɔma dua no ho asem no mu. Sɛ eyi mman foforo, sane yi ahahan foforo a, na ɛkyere sɛ asuso aben.

²⁹ Sɛ mohunu sɛ saa nneema yi a maka ho asem akyere mo yi nyinaa afiti aseɛ resisi a, mɔbehunu sɛ me ba a mesane aba no aben. ³⁰ Nokore me se mo sɛ, awontoatoasoɔ yi rentwam, gye sɛ saa nneema yi nyinaa aba mu ansa. ³¹ ɔsoro ne asase betwam ako, na me nsem deɛ, ɛrentwam da.

³² “Nanso ɛda anaa don ko a awieɛɛ no beba deɛ, obiara nnim. ɔsoro abɔfoɔ ne m’ankasa mpo nnim. Agya no nko ara na ɔnim. ³³ Esiane sɛ monnim bere ko a asem yi besi enti, monsiesie

mo ho. Monwen, ntwen me ba no. ³⁴ Me ba no te se obarima bi a otuu ekwan koo oman foforo bi so. Irebeko no, okyerere adwuma a n'apaafoonye. Enna oka kyerere ne wemfoonye nso se, onwen ho yie nkosi se obeba.

³⁵ "Enti, mo nso monwen, efiri se, monnim bere ko a efiewura no beba. Ebetumi aba se obeba anwummerere, odasuom, ahemadakye anaa awia. ³⁶ Se ofu mu ba a, ense se obeto mo se moadede. ³⁷ Asem a mede agya mo ne nnipa nyinaa ni. 'Monwen.' "

14

Woboo Yesu Ho Po

¹ Aka nnanu na Twam Afahye* ne Apiti Afahye a eye Yudafoonye ahomegyere nna no aduru no, asofoonye mpanin ne Atweresem no akyerekyerefoonye no hwehwee nyansakwan a wobefa so akye Yesu, akum no. ² Nanso, wokaa se, "Yerenkyere no afahye no mu, anye saa a ede basabasa beba oman no mu."

Wosra Yesu Ngo Wo Betania

³ Yesu wo Betania na one Simon kwatani redidi no, obaa bi a okura ngo hwamhwam bi a ne bo ye den baa ho. Otuu ano, hwie guu Yesu tirim.

⁴ Dee obaa yi yee no anye nnipa a wote addiie no mu bi de. Na wokaa se, "Wasee ngo no kwa.

⁵ Anka obetumi aton ngo hwamhwam yi anya sika pii na ode ama ahiafoonye."

* **14:1** 14.1 Eye afahye bi a wode kae eberere a Awurade bofoonye betwaam faa Hebrifoonye anim na okunkumm won mmakan sedee oyeere wo Misraimfoonye afie mu no. (Hwe 2 Mose 12.11)

⁶ Nanso, Yesu ka kyerεε wɔn sε, “**Monnyaa no! Adεn enti na moreha no wɔ ade pa a oyεε no ho?** ⁷ Mo ne ahiafoɔ a mobεtumi aboa wɔn εbere biara mu na εte. Na me deε, merenkye wɔ mo nkyen. ⁸ Wayε deε ɔbetumi. Wadi εkan asra me onipadua ama εda a wobesie me. ⁹ Mereka makyerε mo sε, baabiara a wɔbεka Asempa no wɔ ewiase no, wɔde deε ɔbaa yi yεε no bεkae no, akamfo no.”

Yuda Pene So Sε ɔbeyi Yesu Ama

¹⁰ Afei, Yuda Iskariot, asuafoɔ dumieniu no mu baako, kɔɔ asɔfoɔ mpanin no nkyen ne wɔn kɔhyehyεε sεdeε ɔbeyi Yesu ama wɔn no ho. ¹¹ Asɔfoɔ mpanin no tee asem no, eyεε wɔn anigye ma wɔhyεε no bɔ. Efiri saa εbere no, ɔhwehwεε sεdeε ɔbenya Yesu ho εkwan, ayi no ama εbere a εsε mu.

Yesu Ne N’asuafoɔ Adidie

¹² Apiti Afahyε no εda a εdi εkan a wɔkum Twam Afahyε odwan no, n’asuafoɔ bisaa no faako a wɔbεkɔ akɔdi Twam Afahyε no.

¹³ ɔsoma n’asuafoɔ no mu baanu kɔɔ Yerusalem sε wɔnkɔsiesie baabi mma no. Deε ɔka kyerεε wɔn ne sε, “**Moreko kuro no mu a, mobεhyia onipa bi a ɔso ahina. Monni n’akyi.** ¹⁴ Baabiara a ɔbewura no, monka nkyerε efiewura no sε, ‘Yen wura asoma yen sε, yemmehwε εdan a wɔasiesie ama yen a yebedi Twam Afahyε no wɔ mu no.’ ¹⁵ ɔbεkyerε mo abansoro asa kεsεε bi a wɔasiesie mu. Ehɔ na monye ahoboa mma yen.”

¹⁶ Asuafoɔ baanu no siim koo kuro no mu, na wɔhunuu biribiara sɛdeɛ Yesu ka kyerɛɛ wɔn no pɛpɛɛɛ, na wɔsiesie Twam Afahyɛ no wɔ hɔ.

¹⁷ Eduruu anwummerɛ no, Yesu ne dumieniu no baɛɛ. ¹⁸ Na wɔte hɔ redidi no, Yesu kaa sɛ, “Merema mo ate aseɛ sɛ, mo a me ne mo reto nsa adidi yi mu baako bɛyi me ama.”

¹⁹ Wɔn nyinaa werɛ hoeɛ, na wɔhyɛɛ aseɛ bisaa mmaako mmaako sɛ, “Eyi me anaa?”

²⁰ Ɔbuaa wɔn sɛ, “Eyi mo dumieniu a mo ne me reto nsa adidi yi mu baako. ²¹ Onipa Ba no wu sɛdeɛ odiyifoɔ no hyɛɛ ne ho nkɔm no; nanso onipa a ɔbɛyi Onipa Ba no ama no, nnue! Sɛ wanwo saa onipa no a, anka eyɛ.”

Adidi Kronkron Asehɛ

²² Eberɛ a wɔredidi no, Yesu faa abodoo, na ɔhyiraa so bubuiɛ, na ɔde maa wɔn kaa sɛ, “Monnye nni; yei ne me onipadua.”

²³ Afei, ɔfaa kuruwa a nsã wɔ mu, na ɔdaa ase no, ɔde maa wɔn, na wɔn nyinaa nom bi.

²⁴ Na ɔka kyerɛɛ wɔn sɛ, “Yei ne me mogya a eyɛ apam no mogya a ehyɛ Apam Foforo no mu den a bebree enti wɔrehwie agu. ²⁵ Mereka akyerɛ mo sɛ, merennom saa nsã yi bio da akɔsi ɛda a me ne mo benom bi bio wɔ Onyankopɔn Ahennie no mu.”

²⁶ Wɔtoo dwom bi wiesɛ no, wofirii hɔ koo Ngo Bepɔ no so.

Yesu Hyɛ Pa A Petro Bɛpa No No Ho Nkom

²⁷ Wɔduruu deɛ wɔrekɔ no, Yesu ka kyerɛɛ wɔn sɛ, “Mo nyinaa bɛdwane agya me. Efiri sɛ, Onyankopɔn nam adiyifoɔ no so kaa sɛ,

“ Mɛbɔ odwanhwɛfoɔ no,
na nnwan no abɔ apete.’

²⁸ Na sɛ mewusɔre a, mɛdi mo anim akɔ Galilea akɔhyia mo wɔ hɔ.”

²⁹ Petro ka kyerɛɛ no sɛ, “Sɛ nnipa nyinaa bɛdwane agya wo a, me deɛ, merennwane nnya wo da!”

³⁰ Yesu ka kyerɛɛ no sɛ, “Petro, ansa na anadwo yi akokɔ bebɔn mprenu no, na woapa me mprensa.”

³¹ Petro de anibereɛ kaa sɛ, “Merempa wo da! Sɛ ɛsɛ sɛ me ne wo wu mpo a, merempa wo da!” Saa ara na wɔn a aka no nyinaa nso kaɛɛ.

Yesu Bɔ Mpaɛ Wɔ Getsemane

³² Yesu ne n’asuafoɔ no duruu baabi a wɔfrɛ hɔ Getsemane no, ɔka kyerɛɛ n’asuafoɔ no sɛ, “Montena ha, na merekɔbɔ mpaɛ aba.” ³³ Ɔfaa Petro, Yakobo ne Yohane kaa ne ho, na ne ho hyɛɛ aseɛ yeraa no, na ɔyɛɛ basaa. ³⁴ Ɔka kyerɛɛ wɔn sɛ, “Awerɛhɔɔ ahyɛ me kra ma. Montena ha, na mo ne me nwen.”

³⁵ Ɔkɔɔ n’anim kakra, kɔbutuu fam, bɔɔ mpaɛ sɛ, sɛ ɛbetumi a, saa ahoyera no ntwɔ ne ho nkɔ.

³⁶ Ɔkaa sɛ, “Abba, Agya! Wotumi yɛ biribiara. Ma kuruwa yi ntwɔ me ho nkɔ. Nanso, deɛ wopɛ na ɛnye hɔ, na ɛnye deɛ mɛpɛ.”

³⁷ Ɔsane baɛɛ no, ɔbɛhunuu asuafoɔ baasa no sɛ wɔadeda. Ɔbisaa Petro sɛ, “Simon, woada? Woantumi ne me anwen dɔnhwereɛ baako pɛ mpo? ³⁸ Monwen na mommɔ mpaɛ na ɔsɔhwɛfoɔ no anni mo so. Honhom no pɛ deɛ, na honam no na ɛyɛ mmerɛ.”

³⁹ Ɔsane koo bio kooɔɔ mpaee koro no ara. ⁴⁰ Ɔsane baa won nkyen bio behunuu se woadede, efiri se, na woabrebre. Na wonhunu dee wonka nkyere no.

⁴¹ Ɔsane baa ne mprensa so no, obisaa won se. **“Mogu so adeda a morehome? Eberɛ a esɛ se mode da no atwam. Wɔrebeyi Onipa Ba no ahyɛ nnebɔneyefoo nsa. ⁴² Monsɔre na yenko! Monhwɛ, dee ɔreyi me ama no wo ha!”**

Wɔkyere Yesu

⁴³ Ɔgu so rekasa no, Yuda a ɔye n’asuafoɔ no mu baako ne dom a asofoɔ mpanin ne Yudafoɔ mpanin asoma won ka ne ho a, wɔkurakura akofena ne mmaa baa ho.

⁴⁴ Na Yuda aka akyere won dada se, “Dee mebam no, aye no atuu no, ono ne dee morehwehwe no no. Monkyere no, na monso ne mu yie mfa no nko.” ⁴⁵ Eno enti, wɔduruu ho pe, ɔkoo Yesu nkyen kɔbam no kaa se, “Me Wura.” Afei, ɔyee no atuu. ⁴⁶ Eho ara, na edom a wone Yuda nam no soo Yesu mu kyeree no. ⁴⁷ Won a woka Yesu ho no mu baako twee ne akofena de twaa Ɔsofopanin no akoa bi aso ma etee.

⁴⁸ Yesu bisaa won se, **“Meyɛ owudifoɔ enti na mode akofena ne mmaa aba me so rebekye me anaa? ⁴⁹ Adɛn na eberɛ a merekyerekyere wo asoredan mu ho no, moankye me? Nanso, yeinom nyinaa aba sedee ebeye a nkɔm a wɔhyee wo me ho no beba mu.” ⁵⁰ Asuafoɔ no nyinaa dwane gyaa no.**

⁵¹ Aberantɛ bi a ɔde ntomasini bi asi n’asene dii n’akyi. ⁵² Edom a wɔbekyeree Yesu no pee se

wòkyere no, nanso ògyaa ne ntoma no maa wòn, de ne ho saa ara dwanee.

Yesu Gyina Ɔsofopanin Anim

⁵³ Wòde Yesu kòò Ɔsofopanin no anim no, ankyere na asòfòò mpanin ne Yudafoò mpanin bi behyiaa hò. ⁵⁴ Èbere a wòde Yesu rekò no, Petro tee ne ho dii wòn akyi, na òwiawiaa ne ho kòhyɛɛ Ɔsofopanin no efie hò de ne ho kòfraa asomfoò bi a na wòreto ogya no mu.

⁵⁵ Asòfòò mpanin ne badwafoò no nyinaa hwewhweɛ sɛ wòbɛnya asem bi atia Yesu, na wòagyina so abu no kumfò. Nanso, wòannya bi. ⁵⁶ Nnipa pii bedii adansekurumu tiaa Yesu, nanso wòn nsem a wòkaeɛ no bòò abira.

⁵⁷ Afei, nnipa no bi kekaa nsem a ennim too ne so sɛ, ⁵⁸ “Yɛtee sɛ òkaa sɛ, ‘Mɛbubu asòredan a wòde nsa na esii no, na mede nnansa asi foforò a wòamfa nsa ansi!’ ” ⁵⁹ Na yei mpo, wòn adanseɛ no anhyia.

⁶⁰ Ɔsofopanin no sòre gyinaa badwa no mfimfini bisaa Yesu sɛ, “Yei nso, wonni ho anoyie biara? Èdeɛn na wowò ka?” ⁶¹ Yesu ammua no.

Afei, Ɔsofopanin no bisaa no bio sɛ, “Wone Agyenkwa no, Onyankopòn Ba no anaa?”

⁶² Yesu buaa no sɛ, **“Mene no, na mòbɛhunu Onipa Ba no sɛ òte Onyankopòn nifa, na ònam omununkum mu resane aba asase so.”**

⁶³ Yei maa Ɔsofopanin no sunsuaneɛ n’atadeɛ mu kaa sɛ, “Adansefoò bɛn na wòn ho hia yɛn bio? ⁶⁴ Mo nyinaa ate abususem a òkaeɛ no. Èdeɛn na mowò ka?”

Wòn nyinaa gye too mu sɛ, òsɛ owuo. ⁶⁵ Na ebinom tee ntasuo guu ne so, na wòkyekyeree

n'ani, na wɔbɔbɔɔ no akuturuku bisaa no sɛ “Wose woyɛ odiyifoɔ, kyere yen onipa ko a ɔbɔɔ wo!” Na asomfoɔ a wɔde no rekɔ no bobɔɔ no asotoɔ.

Petro Pa Yesu

⁶⁶ Eberɛ a na Petro te adihɔ hɔ no, Ɔsofopanin no mmaawa no mu baako baa hɔ; ⁶⁷ na ɔhunuu Petro sɛ ɔreto ogya no, ɔhwɛɛ no haa, ka kyereɛ no sɛ, “Wo nso wo ne Nasareni Yesu no na enam!”

⁶⁸ Petro saneɛɛ sɛ, “Mennim deɛ woreka yi ho hwee!” Na ɛhɔ ara na ɔfirii adi kɔtenaa nkyɛn baabi. Saa eberɛ no ara na akokɔ bɔnee.

⁶⁹ Abaawa no sane hunuu no, na ɔhyɛɛ aseɛ ka kyereɛ wɔn a ɔne wɔn nam no sɛ, “Yei nso ka wɔn ho. Ɔyɛ Yesu asuafoɔ no mu baako!” ⁷⁰ Petro saneɛɛ bio.

Ɛkyɛɛ kakra no, nnipa a wɔgyina ogya no ho no hyɛɛ aseɛ ka kyereɛ Petro sɛ, “Woka wɔn ho, ɛfiri sɛ, woyɛ Galileani!”†

⁷¹ Petro hyɛɛ aseɛ kekaa ntam, dii nse sɛ, “Mennim saa onipa a moreka ne ho asem yi.”

⁷² Na ɛhɔ ara, akokɔ bɔnee deɛ ɛto so mmienu. Na Petro kaeɛ Yesu asem a ɔka kyereɛ no sɛ, “**Akokɔ remmɔn mprenu na woapa me mprensa**” no. Na ɔhyɛɛ aseɛ suie.

15

Yesu Gyina Pilato Anim

¹ Adeɛ kyee anɔpatutuutu no, asɔfoɔ mpanin, Yudafoɔ mpanin, Atwerɛsem no akyerɛkyerɛfoɔ

† **14:70** 14.70 Petro kasa na edaa no adi sɛ ɔyɛ Galileani.

ne agyinatufoɔ hyia dwenee ekwan a wode Yesu befa so ho. Wɔkyekyeree no de no kɔhyee Pilato nsa.

² Wode no duruu ho no, Pilato bisaa no se, “Wone Yudafoɔ ɔhene no anaa?”

Yesu buaa se, “**Mo na mosee.**”

³ Eho ara, asofoɔ mpanin no kaa nsem akeseakeseɛ guu ne so, nanso wanka hwee.

⁴ Pilato bisaa no bio se, “Enti, nsem akeseakeseɛ a wɔreka gu wo so yi, wonka ho hwee?”

⁵ Nanso, Yesu anka hwee ma eyee Pilato nwanwa.

⁶ Na eye Pilato amanneɛ se, afe biara Twam Afahye no mu, ɔgyaa odeduani baako a ɔman no pe se wɔgyaa no ma won. ⁷ Saa afe no mu, na onipa bi a wɔfre no Baraba no ka nnipa bi a wɔsɔre tiaa aban, nam so dii awu no ho wɔ afiasɛ ho. ⁸ Edom no kɔɔ Pilato so kɔka kyerɛɛ no se, ɔnyi odeduani baako mma won sɛdeɛ daa ɔye no.

⁹ Pilato bisaa se, “Menyi ‘Yudafoɔ ɔhene’ no mma mo anaa?” ¹⁰ Efiri se, na wahunu se asofoɔ mpanin no de ɔtan na atwa asem ato Yesu so esiane din a na wagye no enti. ¹¹ Nanso, asofoɔ mpanin no tuu dom no aso se, se wode beyi Yesu deɛ, wɔmpere ma wɔnyi Baraba.

¹² Enti, Pilato bisaa won se, “Na se meyi Baraba ma mo a, edeen na menye saa ɔbarima yi a mofre no mo ɔhene no?”

¹³ Wɔteateam se, “Bo no asennua mu!”

¹⁴ Pilato bisaa won bio se, “Adeɛ nti? Bone ben na waye?”

Won nyinaa bo gyee so se, “Bo no asennua mu!”

15 Afei, Pilato hunuu se ɔye asem no hwee a, ɛrenye yie. Afei, na ɔsuro nso se, se anhwɛ a basabasaye beba enti, ɔgyaa Baraba maa wɔn. Ɔmaa wɔbɔɔ Yesu mmaa, na ɛno akyi no, ɔde no maa wɔn se wɔnkɔbɔ no asennua mu.

Yesu Ho Fɛdie

16 Asraafɔɔ no de Yesu kɔɔ amrado aban mu ho, ɛna wɔfrɛɛ asraafɔɔ no nyinaa baa ho. 17 Wɔhyɛɛ no batakari kɔkɔɔ bi, de nkasɛɛ atentene bi nwonoo ɛkyɛ hyɛɛ no. 18 Wɔhyɛɛ asɛɛ bɔ gyee so, dii ne ho fɛ se, “Yudafoɔ ɔhene, wo nkwa so!” 19 Wɔde abaa paa n’apampam, tetee ntasuo guu ne so, buu no nkotodwe, de dii ne ho fɛw. 20 Wɔdii ne ho fɛ wieɛɛ no, wɔworɔɔ batakari kɔkɔɔ no, ɛna wɔde ɔno ara n’atadeɛ hyɛɛ no, de no kɔɛɛ se wɔrekɔbɔ no asennua mu.

Wɔbɔ Yesu Asennua Mu

21 Wɔrekɔ no, wɔhyiaa ɔbarima bi a wɔfrɛ no Simon a ɔfiri Kirene a ɔye Aleksandro ne Rufo agya wɔ ɛkwan so. Wɔhyɛɛ no ma ɔsoaa Yesu asennua no. 22 Wɔde Yesu baa baabi a wɔfrɛ ho se Golgota a (n’asekyere ne Nitire so) ho. 23 Ɛho na wɔmaa no nsã nwononwono bi se ɔnnom, nanso wannom. 24 Afei, wɔbɔɔ no asennua mu. Yei akyi, wɔbɔɔ n’atadeɛ no so ntonto.

25 Ɛbeyɛ anɔpa nnɔnkron na wɔbɔɔ no asennua mu. 26 Asem bi a wɔka too no so na wɔtwɛrɛɛ taree n’asennua no atifi ka se,
Yudafoɔ Ɔhene.

27 Ɛda no ara anɔpa, wɔbɔɔ awudifoɔ baanu bi asennua mu kaa Yesu ho. Na ɔbaako sen ne nifa so, ɛna ɔbaako nso sen ne benkum so.

28 Yei maa deɛ Atwerɛsem no kaa se, “Wɔkan no

fraa nneɔneyefoo mu” no baa mu. ²⁹ Nnipa a wosen faa ho no nyinaa wosowosoo won ti, dii ne ho fe se, “Ei, wo ni? Enye wo na wosee se, wobetumi abubu asoredan na wode nnansa asi no? ³⁰ Se wose wo ho ye nwanwa a, ennee siane firi asennua no so si fam.” ³¹ Saa ebere no na asofoo mpanin ne Atweresem no akyerekerefoo no nso atwa ahyia ho redi Yesu ho few. Wokoo so dii ne ho fe se, “Ogye aforoo nanso ontumi nnye ne ho!” ³² Wokoo so dii ne ho fe bio se, “Agyenkwa! Yudafoo ohene! Siane firi asennua no so si fam, na yennye wo nni!” Awudifoo a woboo wone Yesu asennua mu no mpo dii ne ho fe bi.

Yesu Wuie

³³ Efiri owigyinaee kopem nnonmiensa no, esum duruu asase no so nyinaa. ³⁴ Yesu de nne kesee team se, “*Eli, Eli, lama sabaktani?*” Ase ne se, “*Me Onyankopon, Me Onyankopon, aden enti na woagya me?*”

³⁵ Won a wogyina ho no bi a wotee dee okaee no kaa se, “Montie se orefre Elia.”

³⁶ Won mu baako tuu mmirika, kofaa sapo bi, de boo nsã nwononwono bi mu, de tuaa dua bi ano, de breɛ Yesu se onnom. Okaa se, “Momma yenhwe se Elia beba abeyi no asi fam anaa!”

³⁷ Afei, Yesu de nne kesee team bio, na ogyaa ne honhom mu wuie.

³⁸ Eho ara, ntoma a etwa asoredan no mu no mu suanee mmienu firi soro kōsii fam.*

³⁹ Asraafoɔ oha so panin a na ogyina ho no hunuu ekwan a Yesu faa so wuiɛ no, okaa sɛ, “Ampa ara, onipa yi yɛ Onyankopɔn Ba!”

⁴⁰ Saa eberɛ no, na mmaa bi gynyagyna akyiri baabi rehwe deɛ ereko so. Mmaa no bi ne Maria Magdalene, Maria a oye Yakobo kumaa ne Yosef maame ne Salome. ⁴¹ Eberɛ a na Yesu wo Galilea no, saa mmaa yi dii n’akyi somm no. Saa ara nso na na nnipa bi a wodii n’akyi baa Yerusalem no bi nso wo ho.

Yesu Sie

⁴² Eduruu anwummere no, esiane sɛ na adeɛ kye a eye Homeda† no enti, ⁴³ obadwani an-
imuonyamfoɔ bi a, wofre no Yosef a ofiri Arimatea a, na oretwen eberɛ a Onyankopɔn Ahennie no beba no de akokoɔduru koɔ Pilato ho kōsrɛɛ no sɛ, omfa Yesu amu no mma no.

⁴⁴ Eberɛ a Pilato tee sɛ Yesu awu no, wannye anni, enti ofreɛ Roma asraafoɔ panin a na ohwe ho no bisaa no. ⁴⁵ Asraafoɔ panin no kaa sɛ wawu no, Pilato maa Yosef ho ekwan sɛ onkōfa amu no. ⁴⁶ Yosef kōtōo nwera, yii Yesu amu no firii asennua no so, de nwera no kyekyeree no, odo no kōtōo oboda bi a wōatwa mu, pirem ebōo kɛsɛɛ bi hini ano. ⁴⁷ Na Maria Magdalene ne Yosef ne maame Maria wo ho bi, na wōhunuu faako a wōde Yesu amu no toeɛ.

* **15:38** 15.38 Ntwamutam no tware Kronkron Beaeɛ ne Kronkron Mu Kronkron no mu (2 Mose 26.31-35). Ntwamutam no mu te a eteeɛ no kyere sɛ Kristo ko osoro ma yen sedee ebema yen nso yeapue Onyankopɔn anim. † **15:42** 15.42 Na eye Efiada anwummereɛ.

16

Yesu Owusoree

¹ Adee kyeee a Homeda no twaam no, Maria Magdalene ne Salome ne Yakobo maame Maria kotoo nuhwam se wode reko akosra Yesu amu no. ² Eda a edi nnawotwe no ekan anopahema no, ansa na owia bepue no, wode nuhwam no baa eda no so. ³ Wonom ekwan so reko no, na woredwene dee ebeye a wobepire eboo no afiri eda no ano no ho.

⁴ Nanso, woreye aduru ho no, womaa won ani so hunuu se, obi apire eboo kokuroko no afiri eda no ano. ⁵ Wokoo eda no mu kohunuu aberantee bi se ohye atadee fitaa te nifa so ho. Wohunuu no no, woboo birim.

⁶ Nanso, aberantee no ka kyeree won se, "Monnsuro. Enye Nasareni Yesu a woboo no asennua mu no na morehwehwe no no? Onni ha! Wasore! Monhwe faako a wode no toee ho!" ⁷ Afei, monkoo na monkoka yei nkyere n'asuafoo no ne Petro se, 'Yesu redi mo anim ako Galilea. Eho na mobeunu no, sedee oka kyeree mo ansa na orewu no!'"

⁸ Mmaa no de ehu ne ahopopoo dwane firii ho a, na obiara ntumi ne ne yonko nkasa.

Yesu Yi Ne Ho Adi Kyere Maria Magdalene

⁹ Kwasiada anopa na Yesu sore firii awufoo mu. Onipa a oyii ne ho adi kyeree no kane ne Maria Magdalene, obaa a otuu ahonhommone nson firii ne mu no. ¹⁰ Maria Magdalene koo asuafoo no nkyen kohunuu won se won weree aho, na woresu. ¹¹ Oka kyeree won se, wahunu Yesu na ote ase. Nanso, woannye no anni.

Yesu Yi Ne Ho Adi Kyere Asuafoɔ Baanu

¹² Akyire yi, Yesu yii ne ho adi kyereɛ wɔn mu baanu a wɔnam firi Yerusalem reko akuraa, nanso wɔhunuu no no, ahyeaseɛ no, wɔantumi anhunu sɛ eyɛ ɔno, efiri sɛ, na wasesa. ¹³ Akyire no a wɔhunuu onipa ko a ɔye no, wɔtuu mmirika sane baa Yerusalem, beka kyereɛ nkaeɛ no, nanso obiara annye wɔn anni.

¹⁴ Akyire no a asuafoɔ dubaako no te adidiie no, ɔyii ne ho adi kyereɛ wɔn. Ɔkaa wɔn anim wɔ gyidie a wɔnni ne gye a wɔannye wɔn a wɔbekaa sɛ wasɔre no anni no ho.

Asomafoɔ No Asempaka

¹⁵ Afei, ɔka kyereɛ wɔn sɛ, “Monko ewiase nyinaa nkɔka asempa no nkyere nnipa nyinaa. ¹⁶ Na obiara a ɔgye di na wɔbo no asu no, wɔbeɔgye no nkwa. Na obiara a ɔnnye nni no, wɔbebu no fo. ¹⁷ Saa nsenkyerenneɛ yi bedi wɔn a wɔgye me di no akyi. Wɔde me din betu ahonhommone, na wɔaka kasa foforo. ¹⁸ Wɔbeso awɔ mu, na sɛ wɔnom awuduro bi mpo a, erenyɛ wɔn hwee; wɔde wɔn nsa beɔgu ayarefoɔ so, ama wɔn ho ayɛ wɔn den.”

Yesu Soroko

¹⁹ Awurade Yesu ne wɔn kasa wieceɛ akyi no, wɔfaa no koo ɔsoro na ɔkotenaɔ Onyankopon nsa nifa so. ²⁰ Yei akyi no, asuafoɔ no kɔkaa asem no wɔ baabiara, na Awurade kaa wɔn ho ma wɔyɛɛ nsenkyerenneɛ ne anwanwadeɛ ahodoɔ nso, de hyɛ wɔn nsem a wɔkaeɛ no mu den.

**Biblica® Wɔnhia ɛho kwamma nwoma
Asante Twi Nkwa Asem™
The Holy Bible in the Asante Twi language of Ghana:
Biblica® Wɔnhia ɛho kwamma nwoma Asante Twi
Nkwa Asem™**

copyright © 2020 Biblica, Inc.

Language: Twi

Dialect: Asante

Contributor: Biblica, Inc.

Adwuma yi, Creative Commons Attribution-ShareAlike 4.0 International License (CC BY-SA) na wode bae. Wope se wokenkan kwamma nwoma yi sɛso bi a, kɔhwɛ <http://creativecommons.org/licenses/by-sa/4.0> anaase twere krataa kɔma Creative Commons, P. O. Box 1866, Mountain View, CA 94042, USA.

Biblica® ye ahyensodee a Biblica Inc. akɔgye, na wope se wode Biblica® ahyensodee yi di dwuma a, gye se Biblica Inc. twere ho kwamma nwoma ma wo. CC BY-SA kwamma nwoma nhyehyɛɛ mu no, wobetumi ayɛ adwuma yi sɛso de akɔ mmeaɛɛ ahodoɔ wɔ ɛberɛ a wonsesa Biblica® ahyensodee no. Se woye nsakraeɛ anaase wokyerɛ saa adwuma yi ase kɔ kasa foforo bi mu efa so nya adwuma foforo firi yei mu a, ɛse se woyi Biblica® ahyensodee no firi ho. Nyafirimu adwuma no so no, ɛse se wotwere nsakraeɛ a woaye no ne dee edidi soɔ yi nso ka ho: “Biblica Inc. adwuma kann no wɔ www.biblica.com ɛna open.bible a wonhia ɛho kwamma nwoma biara.”

Ɛse se wotwere Owuraye Tumi no wɔ baabi a nwoma no edin wɔ anaa kratafa a yetwere adwuma Owuraye Tumi gu no sɛdee edidi soɔ yi:

Biblica® Wɔnhia ɛho kwamma nwoma Asante Twi Nkwa Asem™

Owuraye Tumi © 1996, 2020. Biblica, Inc. na wode ma.

Biblica® Open Asante Twi Contemporary Bible™

Copyright © 1996, 2020 by Biblica, Inc.

“Biblica” ye ahyensodee a Biblica Inc. akɔgye afiri United States Patent and Trademark Office de hyɛ won nneema ahodoɔ nso. Gye se Biblica Inc. ma wo ho ekwan ansa na woatumi de adi dwuma.

“Biblica” is a trademark registered in the United States Patent and Trademark Office by Biblica, Inc. Used with permission.

Ɛse se wode saa kwamma nwoma (CC BY-SA) yi ara na ɛto wo nyafirimu adwuma no soɔ.

Adwuma yi a woakyere aseɛ ako kasa foroɔ mu yi, sɛ wopɛ sɛ wobɔ Biblica, Inc. amannee a, yesre wo, ene yen nni nkitaho wo <https://open.bible/contact-us>.

This work is made available under the Creative Commons Attribution-ShareAlike 4.0 International License (CC BY-SA). To view a copy of this license, visit <http://creativecommons.org/licenses/by-sa/4.0> or send a letter to Creative Commons, PO Box 1866, Mountain View, CA 94042, USA.

Biblica® is a trademark registered by Biblica, Inc., and use of the Biblica® trademark requires the written permission of Biblica, Inc. Under the terms of the CC BY-SA license, you may copy and redistribute this unmodified work as long as you keep the Biblica® trademark intact. If you modify a copy or translate this work, thereby creating a derivative work, you must remove the Biblica® trademark. On the derivative work, you must indicate what changes you have made and attribute the work as follows: "The original work by Biblica, Inc. is available for free at www.biblica.com and open.bible."

Notice of copyright must appear on the title or copyright page of the work as follows:

Biblica® Wɔnhia eho kwamma nwoma Asante Twi Nkwa Asɛm™

Owuraye Tumi © 1996, 2020. Biblica, Inc. na wode ma.

Biblica® Open Asante Twi Contemporary Bible™

Copyright © 1996, 2020 by Biblica, Inc.

"Biblica" ye ahyensodeɛ a Biblica Inc. akogyɛ afiri United States Patent and Trademark Office de hyɛ wɔn nneɛma ahodoɔ nso. Gye sɛ Biblica Inc. ma wo ho ekwan ansa na woatumi de adi dwuma.

"Biblica" is a trademark registered in the United States Patent and Trademark Office by Biblica, Inc. Used with permission.

You must also make your derivative work available under the same license (CC BY-SA).

If you would like to notify Biblica, Inc. regarding your translation of this work, please contact us at <https://open.bible/contact-us>.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not

necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-18

PDF generated using Haiola and XeLaTeX on 22 Feb 2024 from source files dated 19 Apr 2023
4d908a5f-6fc6-5f10-9298-e0ab905f607f